



陶菴集 十六

卷一

五

~16  
2325  
18





和  
2325  
卷2分18

陶菴先生集卷三十五目錄



墓碣



生員朴公以洪墓碣

處士慎公權墓碣

處士金公齊顏墓碣

處士慎公復振墓碣

生員朴公好賢孺人俞氏墓碣

生員朴公尚圭墓碣

進士楊公時冕墓碣

處士權公以一墓碣



龍巖閔公 埤墓碣

進士鄭公 穉墓碣

承議郎朴公 承任墓碣

通德郎洪公 聖迪墓碣

贈持平李公 志益墓碣

學生安公 悟墓碣

學生閔公 光時墓碣

學生朴公 濶墓碣

學生金公 始聲墓碣

學生權公 磬墓碣

學生徐公 重榮墓碣

贈持平李公 楫墓碣

通德郎尹公 時卿墓碣

處士宋公 緯奎墓碣

贈參判洪公 受晉墓碣

學生朴公 玄甫墓碣

處士金公 鳴夏墓碣





陶菴先生集卷三十五

墓碣五

生員朴公墓碣

國朝言治莫尚於己卯之世言小人之禍亦莫甚於  
 己卯其時用人有賢良科一路禍既作而法亦旋廢  
 不可復行矣夫三代以後野無遺賢惟此時為然苟  
 有行道之志則宜若有出無處如金老泉先生固上  
 下之所共渴企者而其餘百二十人中不就試者為  
 四十人豈以薦法稍近古而猶以科為名非三代之  
 制而不屑就也耶抑禍機已見不可有為而然耶是





未可知也朴公以洪字士毅 正德丁卯生員當薦  
時有以用心醇謹孝悌夙著爲目者或云靜菴文正  
先生所薦而不可詳也公始在不就試之中禍作之  
後薦中諸賢盡被黨錮之禁公走入月峰山以自晦  
山在昌平縣東洞壑清邃公意甚樂之就峰下置一  
室爲藏修之所圖書蕭散絕無塵趣老年從學者衆  
優游講磨以終其世自號以月影者其亦不受溷濁  
之意也歟朴出咸陽遠祖善仕高麗禮部尙書其後  
簪纓不絕至吏部尙書臣蕤討平南賊事載麗史曾  
祖諱得時司僕卿祖諱鮮司醞署正考諱遂和進士

生及免懷能執父喪不食羶葷時稱三歲孝子妣彥  
陽金氏將仕郎伯衡女司醞公以下皆籍光州至公  
始移于昌世傳公兄以寬爲養出宰潭陽而金夫人  
不樂赴公府公奉以往昌以昌近潭復於就養也後  
不復返鄉子孫仍爲昌人公初配崔氏早歿而無育  
繼娶光山金氏府使崇汀女生五子惟新直長惟哲  
惟年惟成惟吉惟新男吳卿僉知真卿長卿參奉以  
孝旌閭仁卿惟哲男冲卿惟年男春卿惟成男元卿  
亨卿貞卿曾玄以下不盡記公葬于潭陽府南高佐  
院坐艮之原後孫新克來乞銘銘曰



黨錮籍中以靜菴爲首豈獨老年之光華自可百世而不朽

處士慎公墓碣

樂水齋慎公以萬曆癸酉十二月二十三日卒于安陰之書堂壽七十三卒後百有幾年鄉人懷其德廟而祀之詩曰樂只君子德音不已其斯之謂歟公諱權字彥中居昌人德器天成甫成童已能志于學而以親命勉就公車屢發解輒不利旣而歎曰人爵在人天爵在我安可舍我而求諸人哉遂杜門讀書覃思實踐不求聞達以終其身其造詣之深有不可

得以測也顧其可見之行則居致敬養致樂蓋無愧於古所謂孝者而享祀之節尤致其誠嘗作小齋於祠堂西階之側齋於斯祭於斯忌日必前期十日而齋齋之日使子弟進食女奴不敢近前祭則肅然如在老而不能躬則人扶而伏于庭陳饌必一一點視而後進其純孝如此而公則猶欲然不自足也其爲學大抵明體達用而以毋自欺慎其獨爲要嘗曰小學是做人樣子治己治人一以是爲律嚴於正家厚於睦族於人則揚善而隱惡臨歿顧諸子曰汝曹慎勿爲不善嗚呼古人不可見而其心若可見若公者



豈非篤行君子人歟所居有巖泉之勝公樂而忘憂  
林葛川薰兄弟於公爲婦兄弟暇日從遊有訪花隨  
柳之趣李龜巖楨又數相訪畱連講討安陰人至今  
傳爲盛事云公葬於同縣草帖里孺人林氏耐蓋從  
判書公先兆判書諱仁道是生贊成諱以衷生參判  
諱幾參判之孫諱友孟是爲公考妣八溪鄭氏府使  
玉衡女公五男復亨復興復行復振復始女歸士人  
金聲遠諸孫曰證謫諫覲誠誦說諄訥謦謦諾諾  
譎曾玄以下不能盡載公五代孫守彝能紹其家學  
來乞樹墓之文余嘉其志又悲公湮沒不章遂爲之

銘曰

德裕之山磅礴扶輿跨數百里嶺湖意其間必有瓌  
才碩德遯世而不聞者公其人歟

處士金公墓碣

河西金先生嘗詔其門人曰太極圖說道理精明文  
簡意足西銘規模廣闊不泛不漏若天質高明先從  
太極上用功不然則且理會西銘以及乎太極太極  
德性之本領西銘學問之綱紀要之終不可偏廢仍  
手書以授之先生學問門路於此可攷而其授受之  
際門人之賢亦可知公則其人也諱齊顏字士愚義



城之金出自新羅敬順王我朝議政居翼直提學涓  
校理運秋仍三世大顯是生傳賢直長顯護軍於公  
爲考自護軍始居古阜之優德村云公善事親自幼  
少時已然及喪前後廬墓凡六年嘗毀極而疾水漿  
不入口夢人授神丹乃甦人謂誠孝所感喪畢又結  
茅墓下晨夕展拜涕淚汎瀾終身不近華采不聽絲  
竹每喪餘自月朔變食以少時衣有母夫人手線者  
常深藏之祭日必服而行事臨歿又出置床上泣而  
言曰吾死以此斂之其至行如此公旣從河西遊絕  
意公車潛心力學一遵先生所旣旨訣而尤酷好大

學於子弟則以孝經小學爲始其教之也必曰知有  
不明行必窒碍此又得於先生者也又與高峰奇公  
爲道義之交於四端七情理氣之際多所辨難高峰  
嘗勸以仕公笑而不應伯氏齊閔號鰲峰李一齋門  
人也兄弟學有淵源士友咸推重焉公天姿高邁脫  
然無塵累於物少所好獨愛竹雜植庭除顧而樂之  
仍名其軒且能詩往往膾炙人口年六十五 萬曆  
甲午卒葬於同郡先塋之傍室南平潘氏耐男女各  
二人智晟生員以孝克家韓珩判官金剛其壻生員  
生地南文科持平地西地一地精地南取地一子八



陽春先生集卷三十五  
柱子之地西男世柱宗柱地一男鰲柱元柱地精男  
厦柱日晉日恆日漸日休日臨日井日升日謙其玄  
孫而外裔之顯者曰參議柳諫掌令宋思胤佐郎宋  
思翊也余讀鰲峰哭公之詩有曰心清似片冰於此  
可以想見其爲人矣獨其踐履之篤造詣之深有不  
可得以聞者是可恨也然大賢所以嘉惠後學之意  
賴公而得傳於世又烏可少也余故曰河西先生門  
人金公某以此題公之墓足矣

處士慎公墓碣

公諱復振字神之樂水齋諱權之第四子也慎出居

昌自判書仁道葬於傍縣安陰子孫仍家焉左通禮  
後庚進士榮壽承訓郎友孟樂水以上三世也外祖  
曰林石泉得蕃其二子薰芸卽世稱葛川瞻慕堂者  
公素受業葛川之門博學篤志葛川器重之始爲親  
應科屢屈會圍不復爲舉業其居喪食粥三年廬於  
墓側每省拜哀號欲絕傍有老僧嘖嘖叉手於後時  
有朝命焚士大夫墳庵官人到公廬公令焚之則  
再拜而退曰寧獲罪於官吾不忍也婦翁無子欲以  
公次子尸祀公不可及歿亟議於李氏立其後君子  
曰有禮蓋善其不滅姓也婦翁之兄青蓮公後白勸



公應蔭薦公曰呈身干進士之恥也所居山水清絕公就先人故廬日與隣友成石谷彭年講學於其中蓋其樂有人不及知而已獨知之者年八十四萬曆己未十二月十二日終于夜川書齋夜川其號也其明年二月葬同縣古昌里李孺人祔公四男諱詡膺譚女婿參判曹好益忠義柳榎生員景稷光盛景望景逸景運其孫也公爲人溫恭豈弟於鄉黨尤和厚雖不爲崖異之行而明辨義理處事不苟不近聲色不喜交遊安分守身以全其天得蓋以樂水爲父而葛川爲師也公嘗曰怠日終身之喪豈以支子而

不可行祭耶及老而病歎曰少不能爲孝老不能與祭不如死之久矣又戒子姪曰勿言人過失吾家家法也當仁弘有盛名公獨先言其必敗果驗余旣銘樂水公墓樂水公後孫守彝又爲公請銘慎氏之門一何多賢也然而生而不顯於時歿而不傳于史于今百有餘年寢遠寢湮世無有知者嗚呼其可哀也然公旣實有諸已矣雖不知於公何損後之爲善者無或以是而怠焉銘曰

在家爲賢子在鄉爲善士以此銘公庶不愧已

生員朴公孺人俞氏墓碣



嗚呼此故成均生員朴公好賢暨其配孺人杞溪俞氏之墓也公字季容密陽人其先出新羅始祖本朝集賢殿副提學剛生以下五世連擢第大顯考諱忠元吏曹判書妣星山李氏僉正麟壽女公生而穎秀未弱冠文譽藉甚 隆慶庚午司馬兩試自後發解輒居上游判書公卒公柴毀不勝喪年三十二辛巳卒後以曾孫新冑貴 贈司僕寺正孺人考曰泳郡守祖曰絳判書壬辰之亂從其母鄭氏避兵於楊州車踰嶺下寇猝至鄭氏老病不能行孺人相守不忍去遂與母并命車踰嶺卽俞氏先山公始權葬於此

孺人歿而仍耐焉夫孝者人道之大經人孰無一死而死於孝者爲難聖人固不以滅性爲孝然從古死者少而不死者常多則其死者終不害爲孝况婦人移天之後能爲所生辦一死者尤絕尠可以配公而無愧矣嗚呼烈哉凡三男安節早死無後安禮通政楊州牧使安行進士 宗廟令安禮生承任承儒安行生承仁天文學兼教授早死承休承健皆文科執義女適監司李東稷玄冑震冑天冑新冑文冑聖冑慶冑相冑弘冑東冑命冑世冑皆公會孫而外孫顯者李監司之子判書秀彥也玄冑之孫聖源方爲承



文正字以諸宗人之請來徵碣文余夙慕其孝烈遂爲之叙次如此云

生員朴公墓碣

山陰山水甲於嶺南而龍湖又甲於山陰有所謂臥龍亭者故生員朴公尙圭居之其祖考文模亦生員考以懋亦中司馬旋罷榜兩世有文有行酷愛龍湖之勝優游以卒其身至公卽舊廬而葺之仍寓尙友隆中之意滿室圖書一塵不到角巾嘯咏於其中士大夫慕其風致咸折節與交往來冠蓋殆無虛日公家素貧烹魚醺酒各盡其歡以是臥龍亭益名於嶺

南公字賓卿羅州人鼻祖應珠七代祖孟智官校理號春沼者最顯公與弟崇圭友愛甚篤未嘗一日離事親居則致其樂病則致其憂喪則致其哀居母喪時年六十三而不勝而卒癸亥十二月二十日也公嘗移葬其考於龍亭之西從遺志也及是公又葬於其下妣長水黃氏翼成相國喜之後縣令廷說之女公娶清州韓氏其考察訪夢參二男壽一壽齊側出曰壽祉壽祺壽一男師亮進士志亮女爲盧世勛魚翼龍妻壽齊男景亮仲亮季亮師亮來乞銘銘曰龍湖之水清且漣漪嗚呼善士老於斯葬於斯



進士楊公墓碣

處士楊公時冕子整嘗於台山之下赤江之上作落霞亭而居之公萬曆癸丑進士間游太學時昏朝政亂彝倫斃絕公賦長安曲一篇以見志大歸鄉里凶人宰南土者往往過門輒不見仁廟反正公婦黨有當路者勸之仕笑而不應偃仰嘯詠樂而忘世士大夫高其風致年四十二丙寅六月二十日卒葬於山之中麓去亭數里楊之先在麗末大提學以時直提學首生最著直學夫人李氏早寡父母欲奪其志負腹子走南原南原夫之鄉貫而別業在焉夫人

因避寇亂上飛鴻之山望龜岳曰山氣佳哉遂宅于淳昌子孫因之公直學八世孫也考諱士衡正郎祖諱洪副正室海南尹氏端中之女觀察使復之孫一男汝稷高斗望生員金浯李文英其女婿而郡守五舉舜舉說舉高舉震基載基漢基命基翊基生員炯基處基道基春基孫若曾孫也公十五而孤能自力爲學動遵繩墨閨門斬斬有法其實行如此云玄孫應秀近從余游作而言曰吾祖歿百有餘年亭旣廢矣墓亦無刻願得一言之重余嘗得所謂長安曲者而讀之矣詩出性情其人可知也遂爲之銘銘曰



山峨峨兮水泱泱我懷古人兮不可忘

處士權公墓碣

安東權翁子和從余游間謂余曰吾曾大父醉醒公抱德潛光以終厥世墓無顯刻已七十年所其將泯泯焉無聞子其憐之余謹按其狀諱以一字士中始祖幸佐麗祖官太師國朝判書興司諫參壯元及第正郎克中相繼赫舄其後數世不振祖世愚從仕郎考大信文川郡守外祖完山李叢公少而聰穎看書過目成誦萬曆丙午生員未幾光海政亂母后幽廢賊臣纘男鼎吉皆公親黨有時來見公惡之從

後門避去仍盡室歸陽城之德山自後足不跡城市疏糲不繼而處之夷然傲睨塵濁沉冥身世不知老之將至醉醒其堂號也鄉人屢以才行薦聞公漠然無意於世年七十四辛丑某月某日卒始葬同縣萬祥洞又改卜故堂之址室寶城吳氏進士尚吉之女與公附五男碩老碩弼碩載碩儁碩賢側出曰碩平碩洪碩弼生道重碩載生宜重台重衡重碩儁生萬重器重碩賢生泰重翕泰重出也翕之弟曰弁盒余高公志行遂爲銘銘曰

赤城之陽一畝宮醉耶醒耶嗟是翁逢此百罹欲無



聰去惡若洩凜遺風 聖化方新如日中誰令此老  
死蒿蓬衡茅之墟四尺崇我作銘詩詎無窮

龍巖閔公墓碣

余觀古今孝烈固多矣未有如龍巖閔公一門之盛  
者也尤菴先生嘗爲龍巖傳載其事甚詳其傳曰閔  
埤載萬驪興人早拋舉子業跌宕文史砥礪名節寓  
居通津之鳳翔里鳳翔蓋其十世祖愉所居愉知高  
麗將亡以府院君退居入我朝不仕仍歿于鳳翔云  
載萬事親奉祭盡其誠心有四子長之鈺次之鈺次  
之鈺次之鈺女亦四人長爲崔汝峻妻居常訓戒必

以義方 崇禎丙子北虜大至 大駕入南漢載萬  
挈家屬入江都與諸子屬義旅丁丑正月二十一日  
賊曳船于陸地至甲申東岸載萬盡率諸子及奴僕  
出信地把守二十三日朝賊船將渡而我船無一隻  
防禦俄而畱守張紳率舟師至人皆喜躍已而紳偃  
旗止鼓載萬曰此必無戰意也紳果棄船走或謂載  
萬曰事無可爲者一隻船望在岸邊吾輩并力曳入  
於江則可以走矣載萬曰士大夫以義旅爲名事急  
先渡可乎言未訖義將去而師徒潰載萬顧謂三子  
曰已不聞 行朝消息如何又未知疆域餘存者幾



何八路盡爲腥羶之地而今此彈丸一島又如此雖獲保存將安歸聞家屬已向摩尼山追及至德浦曰今日之義惟向潔淨處從容就死而已或曰此去劔島不遠潮退雖無船可以跋涉矣載萬曰跋涉泥濘之際賊騎猝至則雖欲死不可得也且奔走道路苟冀幸免本非吾志也遂同至天登寺升法堂列坐使處女三人并笄各服其服時避亂士庶彌滿寺中載萬厭其紛擾討一靜處寺後有三四間土宇卽移坐諸婦女各解所帶白紬巾自經於宇內載萬臨訣謂奴曰豈望收葬先壠乎一家十餘人同此一處庶得

相依於地下我輩死後毀此宇以掩之汝輩各出圖生可也之卦曰吾豈忍目見父親之亡乎遂先其父而經焉蓋一家死者十三人載萬及庶姊之針及其妻李氏之鈿及其妻金氏之釵及其妻柳氏女崔汝峻妻其次處子三人妾禹姓也載萬父仁伯能文有行號苔泉受學於牛溪先生策勳封驪陽君祖思權副正壬辰倭變 宣廟將西行思權伏 駕前請曰宗社在此請效死勿去外祖縣令鄭熙鄰溫陽人有高行栗谷將薦爲臺官會先生卒遂不果蓋其家世尙氣槩崇節義勵行檢雖其婦孺習熟見聞皆視死



如赴樂地噫人誰無天賦之良心獨閔氏如此者豈無所以也嗚呼先生此言可以不朽於百世雖謂之與日月爭光可也公之後孫懋乞公碑文余遂撮其略而爲之序系之以辭銘曰

此惟天地間正氣之所鍾其鬱結噴薄安知不化風霆而爲長虹使吾東禮義之邦增光於百世繫公一門之功我作斯銘以昭示于無窮

進士鄭公墓碣

咸平之飛川有所謂濯纓齋者進士鄭公穉長孺所宅也昏朝戊午靈光人李垓等主讎母之論設疏

會於本縣公淡懷公正之憤倡多士逐之出境人謂危禍立至而公不少動竟坐是停舉十年築室於斯左右圖書優游自適士夫高其風節丁酉倭亂公門遭禍最酷公母及祖母李氏皆自投于七山之海父進士諱希得與姜睡隱沅同陷賊中終以誠孝感狡奴先姜公出有海上錄行于世公伶仃無依依外氏年尚幼而哀痛如成人不食肉不戲言及父還爲其母追喪哭朝夕公亦從傍哭父止哭亦止又共素以終三年及娶婦入門見其服御華彩容色憾然婦亦感泣去其美飾凡魚鱉之出自七山者不忍近口家



隋書先生集卷三十五  
人無質於市者父疾涕泣嘗糞不一解衣帶每夜久  
命之退不得已出戶外潛候鼻息知安寢而後乃退  
又能善事繼母母嘗歎曰雖自生何加焉其喪也既  
衰而廬墓致毀一如喪父時當祭家內寂然無一聲  
雖病不與祭而祭之日必明燭而達曙其至行如此  
中已卯進士是後不復應舉累登薦剡不沾一命公  
議惜之公性喜任恤窮族歸之如家而來則忘歸尤  
急人之喪不計家有無是以爲鄉黨所重云公生於  
萬曆癸巳卒于顯宗丁未年七十五葬于同縣板  
橋坐西之原配陽城李氏生四男一女弼周鳴周以

周昌周士人李杓其婿也內外孫曾不能盡記絳嘗  
爲公狀德而今又以濟弘之請作樹墓之文濟弘其  
曾孫也銘曰

七山之魚終身不登盤孝哉誰儔滄浪之歌消遣此  
生涯樂哉何求我銘玄石載闡厥幽

承議郎朴公墓碣

蓋當丙丁以後天地崩裂忠志之士多憤慨自廢或  
走入山林或放浪江海若滄海許公格南溪朴公承  
任其尤者而許公猶以詩名朴公務晦迹不見以是  
世無知者悲夫朴爲密陽大家副提學剛生正字切



間左參贊仲孫最有名歷累世至判書大提學號駱村諱忠元是生諱好賢司馬以孝死生諱安禮通政楊州牧使娶青松沈氏縣監友聖之女公其子也公孝友篤至丙子遭牧使公憂既葬猶晨昏展墓雖風雨不廢啜粥飲水不茹菜果是冬虜兵大至士女奔波公方上墓號哭奉母入東峽已而聞城下報西向痛哭不已公素不喜舉子業卒喪不復就舉曰縱未能蹈海而死豈復有當世之念耶杜門奉老孝養備至及憂守制一如前喪有弟承儒抱疾沉痾公年踰六旬所居稍遠而日日躬問如是者累年公多讀古

人書泛濫諸家尤閑於孫吳法丙子亂權井吉自關東勤王逆公於路中間以計策公曰方今城中苦待援兵矣余見龍津渡有訓局倉倉有火藥六七櫃可急遣人取之分兵上黔丹山樹旗張砲以爲疑兵則賊必撤半圍而來襲矣乘此時以輕銳從東門入則賊鋒少挫而我師氣倍矣并吉不果用還敗識者慨恨 孝廟時尤菴先生在朝聞公義槩要與同事因知舊勸起而公終不肯焉己亥 大喪之後公語人曰不久當有 寧陵移奉之議自此山林之禍作矣公歿後果驗公之先事燭幾多如此平居不以產業



經心屋不蔽雨朝不繼夕而常晏如也持身斬斬有矩度而與人樂易以是鄉隣不威而畏無施而恩趙公龜錫爲楊州牧時公里中民有訟於官者趙公謂之曰汝居有君子何不就質耶公之見重於人如此公不喜與俗士游所游多方外不羈之士而滄海翁其知己也年六十三庚戌十月一日無疾而卒葬於楊根水多谷西向之原室龍仁李氏承旨弘望之女與公同年生壽八十四終祔於公墓一男五女男某女某其曾孫聖源從余游乞銘銘曰  
碧海之水不可蹈兮衡門之下可以老兮千秋萬世

應爾悼兮

通德郎洪公墓碣

遜愚洪公有子曰聖迪字允之不幸年三十六而卒遜愚嘗遯于太白之春陽洞 孝廟己亥起布衣授六品官強起趨朝公時違疾將死泣曰何辜于天不復見吾父耶聞者悲之公南陽人副提學洞燕山朝以直道追謫靜菴先生銘其墓子彥弼孫暹皆官領議政二傳爲郡守敬紹遜愚其子也諱錫外祖曰監正杞溪俞尙曾公神秀而氣和幼有至性出遇異味必歸遺父母十三歲虜使至京公發憤倡羣童以瓦



石邀擊于路虜大駭遁去亂作遜愚適不在公搜取書帙中父所嘗好者以隨身顛沛不失兵戈甫定士大夫子弟絕不讀書公獨不懈益勤及長喜棲山房往輒忘返人戒其過勞則曰與其不學而生寧死爲文不事雕刻操筆立成旣屢屈公車遂乃歛就實地於心近二書用力尤至使假之以年庶幾克紹其家學而天遽奪之何也嗚呼惜哉配漆原尹氏縣監敏道女男女皆二人翊相宅相士人權以得王之佑其壻也長房男熙績生員次房男熙緝熙績來乞銘銘曰

嗟遜愚有才有學而不得其位而有賢子而又不得其年奈何乎天

贈持平李公墓碣

肅廟庚子命贈學生李志益爲司憲府持平以孝也抱川人士數百人咸言志益五歲母死九歲而孤善事繼母李溫清之節甘毳之供務以順適其意設枕歛簞未嘗使婢僕代之推以事繼母之母如母母之疾親嘗糞冬月浴於冰泉泣禱神明仍以成疾殆不能起居而母所服饘粥藥餌之屬不委諸家人躬自監視母服之則喜形於色忘己之有疾也母病旋



愈人以為孝感及母死哀毀過節居喪之節一遵文公家禮歆粥以終三年與人語未嘗見齒每以稗年不能執喪為終身至痛衣必純素食不重味每遇忌月不食肉具明衣處別齋以盡其誠又必思平日所嗜之物以辨祭需祭日哭泣號擗若在袒括聞人有老親貧無以養又或親死而窮不能斂者輒為之惻然竭力顧助無難意也年既衰老猶躬行享祀未嘗攝行或勸以調養則公泣曰吾天地間一罪人早失怙恃不能盡人子之職不於此用誠惡乎用其誠聞者感泣死時又飭其子母厚葬雖古所稱孝子無以

加之觀察使臣演以聞下禮曹臣鎮厚請 贈職有是 命今 上丁未又 命旌門公字子謙驪州人高麗仁勇校尉仁德其上祖我朝兵曹判書敬憲公諱繼孫號為名臣公其六世孫也祖諱友廉 贈參判考諱尙豪同知中樞府事妣丹城李氏義秀之女公甲戌四月三日卒去其生戊午七十七葬於抱川蓼洞室咸平李氏府使瑞麟其考無嗣取族弟志得之子時鎮為後時鎮二男曰潭曰濯三州李緯嘉其行表之於碣曰

嗚呼母兮生我鞠我育我欲報之德昊天罔極而鮮



陶菴先生集卷三十五  
或有能盡其職者使視公之行其無愧色

學生安公墓碣

順興安公悟覺初年四十一 崇禎庚子卒葬于果  
川之良才里孺人江陵金氏祔其子堯佐欲乞銘于  
三州李緯老不能躬疾且革命其子衡衢曰吾父之  
棄小子也小子甫五歲儀形易覩也猶不能識其髣  
髴况德之蘊乎中者耶然竊嘗徵諸吾母有一二可  
傳將以是徼惠於當世立言者今則已矣吾其不瞑  
乎既歿衡等亟踵門涕泣而請余悲安氏兩世之志  
遂記其世著其行錄其後承俾刻于墓其世則麗末

洎我朝及第碩謹齋文貞公軸文簡公宗源良度公  
景恭靖肅公純文肅公崇善凡五六世赫然爲名人  
文肅之後四傳爲縣監世寬己卯士流是生進士祥  
祥生春仁忠毅校尉是公三世外祖軍器寺正草溪  
卞廷立也其行則九歲爲卞夫人割指進血其後父  
疾又割股父母歿與僮指二三廬墓下猶自力乎喪  
禮又遭時亂離家事蕩殘比有室能立祠堂備祭器  
晨昏必拜展當祭致慤雖齋餘皮毛之屬不令褻棄  
甚嗜書有市者衣服馬牛亦不恡也又手寫至四十  
餘卷待妻子以義與宗黨以和遇鄉里以恭當路有



聞其賢要與一見終不肯孺人之世曰縣監忠淹牧  
使行其父與祖事君子無違志及寡能理家嚴整又  
教子勤學不爲姑息愛是其行也其後承則曰堯錫  
早死堯佐其次有文行不幸坎壈以歿一女爲李奎  
相妻韓珪李夏根林蘅堯佐之壻李奎相二壻尹泚  
黃腆虞候衡衢俱進士衡男曰載泰載復銘曰  
父母畜兮胡不卒喪亂集兮能自立孝爲楨兮書滿  
籟雖蚤亡兮其澤長

學生閔公墓碣

閔氏世文雅爲東國名族在我朝立巖公最隆顯季

曰監察齊英公其四世孫諱光時字益之考棐參奉  
妣林川趙氏參奉希聖之女立巖公當居清之立巖  
至參奉遂家焉公則生而老歿而葬據其狀公事親  
能竭力或釣於水或採於山得一味必別藏之家甚  
貧僂身之具畢給以至月備歲制靡有餘憾祭奠咸  
如儀又置墓田與昆弟友視其子如己出孤者育之  
仍爲之嫁娶田取荒頓僕取老羸一如薛孟嘗待人  
氣味溫然見不善若浼立巖之後有文忠文貞暨文  
孝忠文諸公相繼大顯公絕無扳援意或勸之仕則  
不應安分守朴以終其世距其生 天啓丙寅七十



附錄先生集卷三十五  
一配安東金氏壽八耄後公四歲耐男晉重漢重虞  
重楚重女申洙鎮岱鎮岳鎮整一房出鎮綏鎮溥鎮  
瑞三房出四房男鎮採鎮溟鎮採爲長房後公內蘊  
實行既壽而臧而多子孫子孫又稍稍以文自振天  
之報善人其在是歟綏岱岳來請銘以余立巖之彌  
甥也銘曰  
宗族稱孝鄉黨稱悌伊聖人謂之士豈必皆文質彬  
彬而後君子

學生朴公墓碣

綾城朴獻可從余游一日以其父思慎之言請曰吾

祖諱瀏字美源者隱居求志蓋類古之遺逸其先出  
咸陽高麗尙書善本朝世子翊贊遂智選清白吏是  
最顯者曾祖主簿荅祖同中樞成仁考通德郎震煥  
世居寶城郡至公始徙于綾綾之邑東五里有冷井  
村公愛其泉壑選勝而居焉其改以寒泉則所以寓  
慕朱子之意也公姿性雅潔絕無塵俗之累幼失怙  
恃不及致養實有終身之慕昆弟四人夜則同衾未  
忍頃刻離違孝友之出天如此鄉俗故多躁競公獨  
杜門守靜以行義自礪善者漸知嚮仰不善者畏之  
居久之風俗寢變頗以禮讓爲事公築石爲砌引流



爲塘左右花竹交映琴書而偃仰其中讀書以自樂  
蕭散有出塵之趣乙卯七月二十七日卒享年四十  
九配清道金氏配君子無違公歿後教諸子成就三  
男斗咸文咸泰咸吾父也吾鄉之人語及公必  
曰善士善士然不有大君子一言之重恐無以徵信  
於後敢以請余嘉其孝遂爲之銘銘曰  
千里相望兩寒泉不見其人懷其賢一室圖書坐蕭  
然此樂惟公獲之先我作銘詩寄幽阡嗟哉令名垂  
億年

學生金公墓碣

公諱始聲字大而金出彥陽高麗名臣就礪之後本  
朝副提學敬直直提學汶最顯歷數世護軍宗胤尤  
菴先生爲作傳是生錡壽職嘉善公其子也少能文  
屢發解不耦老於龍仁之直谷谷有巖泉之勝樂而  
玩之自號玩澗翁讀書飭行以終其身壽七十七葬  
於其屋後公性孝母疾爲之嘗糞血指父老而視聽  
俱廢服勤左右至愛惻怛及喪喪制一從朱子家禮  
每晨謁廟喪餘之齋不與人言語當祭號慟如袒括  
時至老猶然樂善好義尤急人之困嘗游尤菴之門  
已巳栗牛二先生之黜享也飭子弟廢舉南相九萬



爲同研友及貴不一造其門其骯髒自守如此孺人  
洪氏南陽名族運之女男後高後尙後奭女適朴相  
規後高男弘泰弘履弘濟弘晉弘復後尙男弘俊弘  
傑後奭男弘教弘鼎弘益公卒於癸未十一月十日  
孺人後公十四年卒而耐弘教弘復以余之是鄉也  
來請銘銘曰  
有淵可濯有書可讀白首婆娑我全我樂刻此玄石  
以發幽德

學生權公墓碣

權故爲大族自安東太師幸以來世有人國朝有諱

準領議政公其後也祖諱奎僉正考諱士吉洗馬公  
諱馨字樂甫不求仕進終身讀書以自娛壽六十五  
終孺人鎮川宋氏通德郎興吉女公始葬水原孺人  
後公十四年乙酉卒明年三月遷公之墓合封於木  
川原洞山子男四人必衡必達必昌必聞女三人吳  
斗星金樞漢恩君趙廷翊婿也必衡生萬載萬年必  
達生萬重萬裕必昌生萬成萬稗必聞生萬時萬柱  
萬朝萬裕嘗從余道公內行之美親有疾斫指以進  
又爲之嘗糞其喪也啜粥以終三年又推而及於兄  
弟宗黨咸盡其愛此其大者也嗚呼人道莫大於孝



友而公則能之其可銘也已銘曰

有行無位而獨有年豈所謂不得於人而得於天耶

學生徐公墓碣

徐丈行遠以才行進而仕于朝賢公卿大夫多折節與交既而余聽諸鄉人則曰某之翁善士質實無偽德積于躬宜其生是子也今讀狀果然公諱重榮字子觀利川人世居木川上祖神逸新羅阿干高麗章威公熙本朝判書選判書之曾孫應教最顯有諱後長將仕郎娶洪州李起成女生公出爲族父通德郎鏤後牧使壽千僉中樞煥主簿得亨通德以上三

世也公蚤失怙恃其事通德公志物之養靡有不備一言一事無或敢違通德公稱爲孝子通德公三載淹疾公至誠救護爲之嘗藥嘗糞以至親禱山川輿竈而盛冬沐浴致虔及其喪也晝夜露處於殯側雖寒一不入室鄉里觀葬者累百人見其顏色哭泣莫不感悅晚年家業稍饒常有不及之歎每祭具饌豐潔祭之日坐而待晨僂乎若見之其誠孝如此平居整衣冠端坐至寢始解病倦亦未嘗敲臥聞人善若已有之見人惡疾之如讎而至於傷人害物之意不曾一萌於中村秀子弟多從遊勸課有方壽七十九



附錄先生集卷三十五  
壬辰三月二十八日卒室扶安林氏宣務郎尚稽之  
女年七十六與公同年而歿合祔于縣內飛靈山甲  
坐之原一男即行遠進士司憲府監察二女適朴慎  
交金壑行遠男慶普李光白李龍登其女婿朴之子  
宗厚婿李聖登金之子胤錫婿韓後洛慶普二男陽  
遇夢遇武科女爲李命虎郭泰濟張一紹妻監察丈  
遺命託余以墓文不能辭銘曰  
生爲善士死有令子天之餉公亦孔之豐

贈持平李公墓碣

有與靜菴友而色斯高舉以校理終于鄉者曰杏園

李公阜鎮人慕其孝躋享于百源書院公其來孫也  
諱楫字用汝固城人其先在麗末國初文貞公岳文  
敬公岡襄憲公原仍三世大顯五傳而爲杏園杏園  
之曾孫恪同知中樞府事其子健修義副尉於公爲  
祖若考妣咸平李氏僉樞好文之女仲父別提調無  
子子公公以崇禎己酉生自幼有至行愉色順志  
左右致養不使人代勞父母曰是善事我親黨無異  
辭親瘠衣不解笑不矧嘗糞甜苦夜則露立禱天居  
喪啜粥三年每哭墓行路住足出涕羸毀幾不保或  
勸以薑桂之滋則輒泣勸者亦泣不忍復言父病時



思西瓜背節不能得終身以爲恨不復近口以葬地  
不吉積歲誠求比卜兆公病矣趣令子弟行事曰吾  
死不恨矣手執山圖臨絕猶不肯捨且曰父喪吾不  
幸病癘斂殯不克盡誠母我厚葬以重我不孝卒年  
七十五後四年 肅廟丁酉鄉人以公行聞于縣縣  
曰觀察在觀察曰噫旌善吾職也乃上于朝越三年  
贈司憲府持平今 上乙巳復表其閭君子曰不如  
是善者何勸焉又曰杏園公可謂有後矣公端慤謙  
恭非甚病未嘗自逸正容體遠暴慢喜揚人善聞人  
過若無聞仁于鄉黨睦于宗族諸妹貧甚病則賣田

爲藥新作舍無蓋撤其屋以覆之是皆孝之推也恤  
窮匱如不及有喪必匍匐婦家所有臧獲一無問人  
有假貸而不能還者爲焚其券其泊於貨利如此然  
孝者行之首其細可略也室文化柳氏佐郎以厚女  
十歲喪母夜失火將及寢筵仰天哭守不去旣而風  
反火滅人謂之孝感及歸公事舅姑以誠六親稱之  
與公同葬于鎮之玄巖坐壬原一子參奉燮繼娶鎮  
川宋氏父曰之任先公一年卒葬同縣甕巖去墓五  
里而近四女爲安脩尹榎趙奎範進士張源妻余嘗  
寓雪嶽下燮委來謁文越巖嶠凌虎豹而無難色余



辭不敢則泣曰吾老且死無以歸見先人矣語竟復  
泣其後屢見常然辭氣懇欵動人不問可知爲孝子  
子也噫公以杏園爲祖而有子又如此余雖不及公  
公之孝益可信可敬也已遂爲之銘銘曰  
是惟孝子之藏嗟後人無毀傷

通德郎尹公墓碣

尹君鳳適父客死于黃驪翌年鳳適又不勝喪以死  
砥平洪生煥箕於鳳適爲嫻屬鳳適夢洪而告之曰  
吾父嘗爲吾王父哀集言行欲乞銘於李公某不及  
就鳳適受顧言不敢墜失不幸又遽死矣吾已草家

狀又作上李公書爲我語諸弟亟圖之吾乃瞑矣洪  
心異之以其言告之弟鳳休等泣曰果有是矣然吾  
父旣葬吾兄爲取家屬往嶺之安東死而無歸草本  
固已有意而不及耳已而鳳休閱嶺外書帙得之手  
墨宛然蓋死前數日也又泣曰余小子不及知於是  
以其書及狀疾來示綽拜且泣曰此吾父若吾兄泉  
下之望也余感其至誠亦爲之泣按其狀公諱時卿  
字汝相坡平人侍中瓘以德業大著于麗我朝昭靖  
公坤錄佐命功公其九代孫也曾祖參判諱仁涵號  
竹齋 宣廟朝名臣祖諱弘毅京畿都事考諱惟謹



正郎妣安東權氏都事必中女公生有至行其居正  
郎憂廬墓致毀家貧兄弟析居每以爲恨語及流涕  
母夫人或在他所晨夕徒步展省不以風雨而或廢  
出而遇異味輒懷歸以進母夫人嘗病痢竭誠救護  
夜則涕泣禱天三月而瘳人以爲孝感事伯氏如嚴  
父待家族有恩見幼小者必舉祖先孝友敦睦之行  
申戒不已嘗謂黨議乖人心術平居罕與人論辨甲  
寅尤菴先生之受誣也公慨然曰此世道消長之機  
也同朴公泰斗上章直其冤蓋公考正郎公以太學  
齋任嘗首倡栗牛兩先生從祀之論家世主張士論

如此公性好酒而不及亂往往發興吟哦格調清高  
筆法亦遒勁可喜屢舉卒不第年四十六乙丑五月  
五日卒士友咸齋咨曰斯人至斯相與賻襚而斂之  
時母夫人猶在堂公臨命無他語惟以不得終養爲  
痛葬於永平先山負甲之原配羽溪李氏德雨女無  
育繼配清州韓氏考曰司果賴喪公三年之後猶疏  
食惡衣以終身一男二女男明啓卽顧言者女適金  
聖溥洪鎮杓明啓四男鳳適其長進士次鳳休次鳳  
彩次鳳周出後族人女爲金德綏黃圭李龍瑞妻金  
聖溥子大徵洪鎮杓二子聖箕胤箕申思幹李永配



其女壻也鳳適之男曰心傳公之善行多可書而大抵一本之孝觀於子與孫而可知其所自矣况鳳適之事甚異豈天相至孝欲以是彰公家三世之孝也耶嗚呼是亦有是理也銘曰  
永之水兮清瀉永之山兮窈澗惟此一片石兮千百世之下尙或見孝子慈孫之心

處士宋公墓碣

宋君頤錫湖南之望士從余游學嘗以柳上舍乘所爲狀爲其從叔處士公請樹墓之文余讀其狀公諱緯奎字善徵宋氏始出礪良中間一派移籍于新平

蓋從郡守自殷始歷四世有大護軍起源生諱格同知中樞其子諱之煥娶進士光山金成輅之女是爲公考妣公生而穎秀異凡兒學書不煩師教而能通大義穉齡遭外艱執禮如成人其事金孺人極其誠愛朝夕入廚躬視烹飪務以適口或言其太勞則曰如是而後於分爲安孺人年高病甚頃刻不離側起居飲食必身爲之扶持孺人憫其憂悴強令退歇公雖未敢違然常屏息門外屬耳窓壁間以候氣息之如何如是者四五年如一日疾旣革連夜澡浴拜于北斗旣又築壇園中至誠祈禱于上下神祇願以身



代而不能得則毀極而僅不死喪除後數年猶不與人宴樂其祭也儉然如或見之庶羞取精不務多子弟或不謹於齋潔者必斥退之雖僕隸之助供者不令以不潔入齋所自以早孤擬以所事先人者事其季父所居不甚邇而必日一候焉祁寒盛暑未之或闕得一美味必先進之出入又必告焉教子弟以義方亦皆信服不敢爲非以門內多窮族與數三家稍饒者捐出餘財每朝夕登石亭高處望見烟氣不起則曰某家飢矣亟取以救之宗人有欲賣田以爲生而患瘠确不能售公令於已田中聽其自擇又憐其

族兄窮甚爲之構草屋邀與之同居薪水之勞亦令婢僕同之其敦於睦嫻任恤如此蓋公天資篤厚性又嗜書老年猶閉戶深居仰讀俯思日誦中庸大學以自勵故其實行之可見者又如此以戊辰二月十五日卒享年四十七是歲九月葬於縣南天堂洞公配錦城羅氏進士僖之女後公六年歿與公祔二男範錫次曰文錫進士余惟公溫醇謹恭之德洽于家庭信于鄉黨殆古所謂善士者遂敢樂爲之役而所恨頤錫已死不令見之也系之以銘曰  
十室忠信聖人有言如公篤行孝爲之源身備六德



到老彌敦嗚呼君子終不可誼作銘闡幽表茲墓門

贈參判洪公墓碣

南陽洪公受晉卒于高山之寓舍無嗣仍葬其縣北  
卒後十五年壬午婦具氏上言乘輿前願以兄子禹  
傳爲後 上矜許之蓋公嘗於諸子中賢禹傳禹傳  
已亥以咸陽郡守闡乙科越二歲進職爲慶尙道觀  
察使遂 贈公吏曹參判具氏封貞夫人人曰洪公  
真知子哉觀察尋進二階爲行大司諫大諫將樹碣  
墓前屬余爲文粹敬諾未幾大諫卒粹心悲之猶因  
循不就旣而歎曰使公復起吾無愧乎亟取其狀而

叙之公厚重寡言笑器度甚偉事親有至行居喪暑  
不脫衰經病不近薑桂與羣兄弟處油油如筆研服  
食無一物自私遠貨色避勢利接人和易無畦畛每  
論古今人得失聽者忘倦性又聰穎傍治明經業謂  
一第可朝暮取卒不偶命也麗氏佐命臣殷悅實鼻  
祖我朝友菊齋諱敬孫石壁諱春卿海峰諱命元俱  
以文學才猷顯海峰之子諱處溪僉正公考也妣羅  
州朴氏錦溪君東亮之女公字景三 崇禎甲申生  
戊辰四月七日卒具出綾城夫人考曰通德郎致中  
四壻李敏榮宋必熙直長尹直教李宇濟生員長婿



子東喆宋繼子生員載萬尹子東淵東游東啓季婿  
繼子集聖大諫娶吾叔祖打愚先生諱翔之女男啓  
福有雋才未娶夭啓祿蚤死啓禧進士始夫人之上  
言也或謂曰不有四女乎夫人曰不者無以見君子  
於地下卒備享榮養及大諫卒夫人大耄猶無恙悲  
哉然大諫以直道見黜而死士論賢之有子如此公  
鑑識之明於是乎益驗矣吾知不食之報將永世而  
無窮也銘曰

生子未必賢賢未必不窮生無子而死有子子又賢  
而達夫誰如公嗚呼知子莫如翁

大諫公卒後一年己酉夫人卒去其生壬午八十  
八十月八日穿參判公墓而葬焉夫人誠孝出天  
母李氏篤老久疾夫人窮晝夜扶救嘗藥奉衽浣  
滌廁牀之節靡不躬親歷三歲如一日羣兄弟咸  
歎曰吾儕愧且死矣相與割田民爲券而歸之夫  
人辭不能得夫人早寡能自力紡績嫁諸女不失  
時晚年備受榮養輒愀然出涕曰吾忍獨享是乎  
衣衾之屬終身不近華靡在嶺營時晷辰例獻亦  
多不受夫人善行多可書而其嚴正識大體已見  
於原碣其細可略也



學生朴公墓碣

朴君聖源士洙自布衣時力學績文有聲士友間及擢第始從余游疏糲不給相守不去余寡拙獨學淡有相長之益若士洙者使置程門庶無愧於已仕忘爵祿者矣今上甲子坐直言梲棘於南海島中日讀書不怠曾以其祖考學生公樹墓之文見託又有書速之余遂出其狀而讀之公諱玄胄字叔度朴氏自新羅時分封八大君而貫密陽者最盛入國朝副提學剛生生切問正字是生左參贊仲孫生相禮曹參議是生光榮刑曹參判參判之孫諱忠元吏曹判

書大提學號駱村於公爲高祖曾祖諱好賢生員贈司僕寺正祖諱安禮通政楊州牧使考諱承任承議郎丙子虜亂後不赴公車有隱德號南溪妣宜人龍仁李氏承旨弘望之女公以仁祖丙戌生天性慈仁器度寬厚庚戌承議公暴疾濱危公涕泣號天卽斷指和血以進而竟不救公執喪盡禮奉母夫人一意承順家本清貧併日而食親廚甘旨未嘗乏絕晝夜常在親側躬視藝薪以適其溫涼其宿於外也雞鳴必入非不得已則雖隣不往往必早還母壽八十四而終公哀毀踰節成服後猶糜粥不入口哭不



絕聲閔孺人曰夫子必以生時奉養之節未盡而然此則妾之罪也又泣而不食衆人皆不食而泣公之庶弟適出外歸見苦次及諸房裏有哭咽聲如未殯時入視之皆臥而不能起遂泣而告公曰將使闔家盡死耶取粥飲力勸公始強進之公永感後不復爲公車業且不喜交游杜門潛居好讀經傳日有課程至老猶筭而讀之如童子時燕居必跪坐雖對子弟少無褻容御家衆多寬恕而中有法度諸妹婦女同室者多至十餘人而公嚴飭婢輩切無往來雜言務令一家內外上下一於和樂平時若不以事物經心

而宗黨或有難處事則必先幾默運臨變裁斷動必中窾待鄉鄰大小一以恩厚皆得其歡心己卯二月三日邁癘卒享年五十四臨終顧諸子縷縷教戒無非義方始葬于楊根移葬揚州大谷里坐卯之原配孺人閔氏節度使墀女別有誌年九十而終與公祔舉二男四女男震錫乃錫女適士人權聖徵李瑜黃宗烈進士洪河瑞文科佐郎震錫三男一女長最源次聖源卽以言獲譴者次泰源出爲乃錫後 健元陵令金應祉其婿也諸孫宗相宗植餘幼余嘗怪士沫勤篤非今世士方知來歷可徵靈芝無根醴泉無



源豈虛語也耶如公寬恕孝友之德宜若爲神所勞而卒坎壈以終其身豈爲善無不報而遲速有時而然耶士洙雖不遇於世而天之困窮而增益之者似不止於今而已吾於士洙且卜之也姑書此以俟之云銘曰

駱村之後近稍不振讀書田地種子未殄培以孝友壅以忠信既有于躬胡靳其進我闡厥幽貞石不泯有孫克肖旣勤且敏如彼醴泉有源斯浚爲善之報萬億無盡勉哉後承餘慶是認

處士金公墓碣

河西金文靖先生道學節義卓然爲百世師先生之先數世居長城其後多以文行相尙有諱鳴夏字大遠其四世孫也幼有美質不嬉戲謹守長者教不失淡居喜讀書村人號樓上郎居喪哀動隣里終三年不見齒祭則肅然如在蠲濯陳設必躬莅之每日晨謁節物不薦不食別立祭田文靖公易名久子孫貧不能迎 恩至公始克行母病思西瓜不時不得公以爲恨終身不近口又能事繼母孝析產自取荒頓又割己田以周外黨之窮者平居儀度可觀嘗與人行凍雨公所騎良猶緩驅如常見在後者有遽色引



嚮讓路子弟有過不少貸見人善欣然慕之不善者面斥之於卑賤則輒爲之惻然曰此殆不知而作者嘗寓默會村隣有爭楮而毆其妹者公招致開諭若蘇瓊之於乙普明自與之如其數其人叩頭不敢受還其所爭仍與讓田改爲敦睦之行人皆感服去後追懷不已少攻舉業甚力親歿則曰欲爲榮誰爲榮杜門溪山足不及官府左圖右書雜植花木嘯咏其中年六十違痘自知不起作挽歌抒懷子弟勸藥物不肯曰命也以丙戌六月九日卒葬于華蓋山下先兆曾祖從虎察訪祖南重考亨社 贈佐郎妣南原

梁氏山嶷女公配李氏國姓能盡婦道公平居不問產業人謂內助爲多後公七年歿墓在麥洞二男致瑞奎瑞三女爲邊侏鄭萬濟林蘇妻致瑞生宅賢普賢挺賢壻鄭堯臣鄭樸奎瑞生宗賢益賢得賢閔師淵壻也佐郎公有至行鄉井以聞方議 贈典公臨死飭諸子曰恨吾不及見制下可告我如其言公常自誦曰萬一有不義之事是辱先也其操心飭行如此故一鄉稱爲善士歿而咸嗟惜之嘗聞河西翁於小學書用工最淡今以公狀觀之其言行不合於小學者蓋鮮豈亦得之家庭緒餘耶嗚呼若公者真河



陶菴先生集卷三十五  
西翁子孫也公臨老又作十訓以飭後孫云銘曰  
詩不云乎夙興夜寐無忝爾所生公實有之我以為  
銘

陶菴先生集卷三十六目錄

墓碣

通德郎閔公寅重墓碣

贈持平吳公斗雄墓碣

學生趙公鳴時墓碣

處士李公鼎夏墓碣

僉知兪公順基墓碣

通德郎沈公漳墓碣

生員金公光白墓碣

處士安公堯佐墓碣





處士安公汝諧墓碣

進士李公社億墓碣

僉知李公通墓碣

贈持平金公碩勛墓碣

通德郎閔公真翼墓碣

贈參判尹公愿墓碣

通德郎閔公齊夏墓碣

通德郎鄭公續明墓碣

贈持平洪公泰猷墓碣

通德郎安公允成墓碣

學生朴公敏揆墓碣

學生李公後白墓碣

學生尹公栻墓碣

學生黃公穉墓碣

進士朴君景陽墓碣

孺人南陽洪氏墓碣

淑人恩津宋氏墓碣

孺人潘南朴氏墓碣



陶菴先生集卷三十六

墓碣六

通德郎閔公墓碣

吾外氏驪興之閔世以文雅稱至振衣諱汝任有清白之節其子枏社稷署令生諱光煊公其子也諱寅重字士建天性至孝親病嘗糞驗差劇吮疽完合乃止甲子荐丁內外艱哀毀踰制葬祭盡禮啜粥以終三年及吉猶不近華服滋味卹卹有終身之喪與一弟同室常以一衾一卓共其寢食其樂翕如弟亡久而枕席有涕泣處乙丙大飢得一飯必先饋孤寡而





後及已子其教子亦以孝悌爲先性又脫略不治生產每日家無長物貧以受之貧以傳之可也老峰兄弟於公爲三從李相國尙眞亦其從叔咸勸以仕公不應有時入洛不肯少淹遇宗族敦睦與人交一以忠信其行諛大略如此室寶城吳氏正言世佑之玄孫父曰高十四爲母血指旣配公而未于歸也知公菽水不繼每朝夕却食涕泣父母感其誠分粟周之而後乃食及歸甘旨必給雖典衣截髮而無憚也姑久病不櫛患多蝨孺人自油頭共枕引蝨止痒往往孝感若冰鯉慕雀故事公年五十五壬午三月二十

日卒葬于清州兵馬嶺枕西之原孺人先公六年歿至是耐嗚呼余讀經傳大率必先言孝孝者仁之發而善之長是以推之四海而皆準似此孝子孝婦在古亦鮮况并萃於一門者乎鄉人以其事行聞于朝請加旌褒而不及施行公議恨之然公則自盡子職而已何求人知其刑家之化亦足以勵世而範俗豈待棹楔而後顯哉男鎮耆女婿申混宗簿寺正鎮耆二男泳沫向沫申子喜清尙清彥清鎮耆使向沫來乞銘銘曰

人生百行惟孝爲先繫公之德蓋原於天亦越孝婦



其行孔嘉不有實心何以刑家清白之門添一光華  
我是自出其言以實勉哉後人遵守勿失

贈持平吳公墓碣

公諱斗雄字季明自號隱谷海州人其先出高麗軍  
器監仁裕近世天坡諱翻百千堂諱翻俱有文章行  
業至忠貞公斗寅又以身殉國鄉人立院以祠之由  
是吳氏蔚爲名家公百千堂之季子忠貞公從父弟  
也爲人恬潔少嗜欲罕言笑窮居六十年不爲一毫  
非義事以布衣終世居陽城天德山下鄉人稱公必  
曰孝子孝子蓋公六歲而孤事母元氏一順其意藹

然有淡愛母寢疾爲之嘗糞時方嚴五日浴冰泉涕  
泣禱天及其喪也哭踊屢絕食不過糜粥身不近絮  
衣常露宿柩前旣葬猶不能去伏於土階父兄爲築  
土室於廬側當夜入處枕塊假寢晝則又如初父兄  
憫之又毀其土室則公又露處如未葬又不得已還  
築之毀而肢體皆腫杖而後能起朝夕必上墓哭大  
寒暑風雨亦無曠其常伏處草不生有雪則躬執帚  
除之旣免喪而服禫居外寢者又三年意欲爲其考  
稅服也老年語其家人曰吾日拜廟未嘗不涕出今  
也不然殆將死乎果如其言縣屢舉公事行久而達



隋書卷三十六  
于朝 命除職公蹙然曰藉令能是是吾常職耳敢  
處其名歿後縣申請不已今 上丁巳始 贈司憲  
府持平辛酉又 命旌閭嗚呼忠孝者人道之大紀  
忠貞公死於忠矣公則幾死於孝而不死是天不使  
公而死於毀以全其孝也或死或不死固天也而若  
公者不愧爲忠貞公弟也忠貞公於吾爲外舅余屢  
拜公於忠貞故第容貌清臞絕無塵俗氣整襟危坐  
肩背竦直雖盛夏亦然近又僑寓隣縣得其實行甚  
詳益知公之爲可敬也抑又聞公性嗜書至老彌篤  
日誦易以爲常其得於學力者亦深矣豈非朱子所

稱活孝悌者歟元氏之考曰大君師傅振海公配東  
萊鄭氏節度使漢驥之女一男五女男宗周婿李壽  
頤韓大震沈兌殷鄭鐔李台齡孫曰瑋瓊瑾璫公卒  
於 肅宗丙申三月八日年六十九鄭氏生先公二  
年歿又先公一月同葬于縣之先山右崗宗周使瑋  
請銘銘曰

形如枯木心如寒冰我見其人雖遠可徵人曰孝哉  
公若不能身後褒榮于公何增此其行源勉哉後承  
學生趙公墓碣

趙氏出楊州其居溫陽者尙行諛敦孝悌實自時庵



附錄先生集卷三十六  
公始時庵諱相禹是生掌令諱爾炳尤菴文正先生  
狀其兩世名行甚詳掌令子五人承旨鳴謙府尹鳴  
鳳皆貴顯其長鳴時獨不顯年七十三以終識者曰  
是有良貴存焉公字聖之自孩提時已能知愛親得  
一甘輒忘其口六歲喪時庵公其哀動人平居色容  
愉婉未嘗一違意掌令公嘗稱以知己其侍疾也不  
解衣而寢與醫言涕漉漉下每夜露立禱天及居憂  
啜粥水飲一遵文公家禮既吉不純采母病時思山  
昔時大雪公就樹間得抽芽以進又夢人指吉地以  
葬其孝感如此已已 坤位將傾公同諸生守闕哭

又直尤菴先生之寃自是大歸鄉閭後幾年仲弟死  
公泣曰孤生惟兄弟爲依不幸闕睽以至於此悔將  
何及遂盡室還長枕大被常怡怡也公雖居闔閭中  
皎然自守不與人徵逐溪坐看書壬寅士禍作兄弟  
奔迸承旨公又卒公悲悒成疾仍不起時甲辰六月  
十九日臨命作詩戒諸子孝友嗚呼仁義之性人所  
同得而私欲害之鮮有存者公能存而不失以終其  
身則是貴也豈文繡膏粱之所能易哉公文藝夙成  
爲先輩鑑賞卒贈澄不第潛心經傳最嗜朱子書飭  
躬莊整遠貨色自號勿齋云葬在龍仁負兒山掌令



隆慶先生集卷三十六  
公墓傍妣忠州池氏性淵之女配南陽洪氏領議政  
暹之後父曰聖希先公廿六年卒二男文彥奎彥皆  
進士三女適生員李命龜金球具斗南側出斗彥奎  
彥來請文據其狀而爲之叙系以銘曰  
古之人修其天爵而入爵至焉今之人徒求人而不  
知天故有其天者未必得乎人吁嗟兮其誰使然

處士李公墓碣

士有公輔器而老布衣城市居而志邱壑者以余觀  
於近世其惟李公鼎夏乎公字重叔自號石泉藥圃  
先生諱海壽之玄孫藥圃之考曰領議政貞肅公諱

鐸全義之李至是益大會祖諱勸掌樂院正祖諱省  
身承旨考諱杭司憲府執義四世掌史蔚爲名家公  
狀貌俊偉氣度嚴凝幼游教官之門講誦製作輒屈  
曹偶南壺谷龍翼於春曹課試見公詩大加稱賞及  
長連捷大小解額輒不利於會圍年四十得母命便  
廢舉屏居積城先墓下親族有欲爲公求仕者公曰  
毋近世無不求而仕者士大夫子弟之爲蔭仕者可  
恥家素清貧疏糲不給而處之適然秉心行事未嘗  
有一毫苟且性嗜酒或有家釀告熟輒聚羣從及親  
友劇飲醉歡酒盡而後乃已其氣象甚好老爲婚嫁



陶菴先生集卷三十六  
未畢強入都下而非其志也溪居自守未嘗一迹顯者之門顯者或來過不爲之一謝鄉人嘉公至行舉狀聞于方伯蓋言公誠孝篤至五歲執義公見背公以不及逮事爲至痛語及輒出涕終身孺慕不衰其奉母夫人愛敬俱備侍側則愉色婉容承顏順旨奉養則竭力耕桑輕煖之資滫瀡之供咸適其宜侍疾則色憂心煎藥餌粥飲非先嘗不進左右扶將未或少懈至於廁牖之洗滌靡不躬親不令人代之居喪則身不脫衰麻足不到閨柵三年如一日朝夕哭泣淚盡而血哀毀成疾幾至滅性雖古所稱孝子無以

過也其言至公異趣者亦無異辭方伯用薦于朝屢登除目竟不得一命命也公又友於兄弟姊氏舅家遇禍門戶殘敗無所於歸公奉以歸爲之經理生事教諸甥無間已子公少贅于尹氏之門嘗從尹拯受尙書而終不稱師及拯狼狽人間其是非則曰尤翁吾素所心服而彼亦有受書之恩詬斥亦所不忍也其處義之精當如此公好善惡惡出於天性當尤菴先生以禮論被誣於羣凶也章甫欲上章伸理而畏凶焰無敢當疏頭者公親往鄉外勸起一人望以來卽所謂尹樞疏也已已 聖后遜位吳陽谷諸公諫



陽者先生集卷三十六  
死公時在鄉涕泣憤慨倡多士詣闕抗疏疏雖不得  
上而士論壯之丙午八月二十六日感疾卒壽七十  
五公配坡平尹氏先公九歲卒至是合祔于通津石  
井里執義公墓左負丑之原公有二男三女長秘次  
璠士人黃最縣監朴泰容申鈹其女婿也秘二子仁  
錫智錫璠二子俱幼仁錫從余遊秘使來乞銘銘曰  
藥圃之後近稍零替公生傑然謂將克世懷藏國器  
一命終慳婆娑自樂石泉之間晚隱牆東心遠地偏  
遇酒淋漓少泄壹鬱高臥傲世缶歌昊日原厥孝友  
本於仁兮仁必有報遲速不齊銘以表之請於是稽

僉知俞公墓碣

公諱順基字禮以初名敬重俞氏出杞溪穆陵之  
世有議政泓改宗系有功諡忠穆其兄灝官丹城  
縣監於公爲五代祖曾祖諱魯曾濟用監直長祖諱  
楠從仕郎考諱命恒妣光州金氏進士自一之女公  
爲人重厚寡言笑少治舉子業不利老於陽城之黔  
巖夙興盥櫛整衣冠端坐終日無怠色家甚貧處之  
晏如一毫不苟取見人麤鄙近利者若將浼焉然亦  
不喜言人過失人亦無怨今上丁未鄉人以公實  
行聞于朝蓋言其事母有溪愛平居愉色婉容夏則



扇枕冬則抱薪以適其溫清竭力致養廚不乏滋味  
病時嘗糞甜苦又涕泣禱天若有靈感及喪歆粥以  
終三年遂有除職之命公薨然曰事親以孝子之  
常職由此得官吾甚恥之戒子孫曰爾曹切勿以此  
干人也辛亥以大耄陞通政拜僉知中樞府事癸丑  
正月八日卒壽八十二葬于安城玉井先山配安東  
權氏護軍碩賢之女己丑卒至是合祔後壬戌追

贈戶曹參判權氏亦從 贈貞夫人男彥嵩彥華彥  
衡女適睦寅協長房男漢龍漢鳳漢麟漢龍佳士嘗  
從余游蚤死漢老漢耆次房出漢祚漢祺三房出銘

曰

吾盡吾職何求於人天錫大耄以報厥仁我銘斯石  
玉井之原嗟爾來裔此爲行源

通德郎沈公墓碣

沈君致賢養汝青松名閥而寓居善山重義氣且愛  
山水余喜其人嘗一訪於所謂鸕鷀亭者信嶺之勝  
區也仍跌宕數日而歸後過余於寒泉之居託以先  
公墓文余敬諾而衰疾侵尋未能爲也未幾養汝訃  
告至余爲之一慟亟取其家狀而讀之公諱漳字仲  
浩沈自麗氏衛尉丞洪孚始見于譜我朝德符用佐



命勳門下侍中青城伯是生安孝公溫實 昭憲王  
后之考也歷二代舍人順門燕山朝冤死其子領議  
政連源諡忠惠又其子青陵府院君綱青陵十子有  
曰青陽君義謙於公爲五代祖曾祖諱光世舍人生  
諱摠以廣州府尹爲人所構誣尤菴先生爲直其冤  
曰摠於國家事前既不愛死後豈復愛錢者哉是生  
諱若河敦寧府判官娶 穆陵王子慶昌君珣女公  
其第二子也公十二歲孤又十三歲而失母自以鮮  
民抱終身之戚每喪餘自月初不肉終其日泣血無  
異袒括之時事季父如父左右服勤極其愛敬其內

行之篤如此又能勇於趨義聞人家貧親老則惟恐  
周急之不暇人有憂患喪葬亦必匍匐而救之仁厚  
之德蓋其天性然也識者咸期以遠大而公則以祖  
父冤誣未雪至痛在心廢公車業退守鄉廬語及家  
禍未嘗不涕咽不與人歡狎不赴人宴集杜門養靜  
以終其身子孫落南蓋自公始 肅宗丁亥八月二  
十日卒于寒沙洞精舍享年五十四用是年十月二  
十日葬于府南朴谷坐壬之原二孺人并祔星山李  
氏縣監墀女觀察使尚逸孫一男尙賢出爲伯父後  
者其出也延安金氏通德郎昫女三男友賢致賢龜



降者先生集卷三十六  
賢女婿士人洪熙大李匡績諸孫生員鉉進士鍵鐔  
縛銘鍼鑰鍍也余既最其大要而叙次之系之銘曰  
嘻公仁厚孚于家鄉宜達而窒有識所傷然且有  
孝爲行源抱痛自廢可謂賢孫有墳三尺一善之野  
銘以表之忍負逝者

生員金公墓碣

公諱光白字景純其先實新羅國姓移籍豐川府遠  
祖原少府監始遷于德源至子孫再遷爲永興人參  
奉璉祐學生應祥嘉善克錡其三世也公 崇禎乙  
未生十舉鄉解年七十三升上岸時二子已擢第人

以爲奇事越五年壬子卒嘗爲 和淑二陵參奉云  
公質直好義能自奮力學一以小學爲則至老猶讀  
書不倦性嗜古家祭必淡衣治喪用家禮又講行冠  
昏諸節不以窶爲辭其在母憂也渾家違癘獨守殯  
不去卒亦無恙以父外氏無嗣爲置祭田喪師以三  
年皆人所不能及也雖身在畎畝而惓惓憂國言論  
忼慨或幾乎涕出吾舅趾齋閔公奉使北下公條進  
興學詰兵之策又欲一叫閭極言邊事不果上余嘗  
恨士之老死草澤者往往有志有才而世莫之聞若  
公者亦可謂北方豪傑之士也以吾所知者如此其



陶菴先生集卷三十六  
所不知者又復何限嗚呼三代立賢無方之盛吾不  
得以復見也耶公葬于同府草阜鄉室開城崔氏年  
四十七癸未歿及是耐男長益恆次益熹益懋益恕  
益勲皆夭益憲正郎益忱典籍側出曰益惇益慎益  
恬女歸金萬載公嘗築書室於松浦教授村秀子弟  
歿而仍尸祝之余曾爲公誌益憲又來請銘銘曰  
聖朝文教覃及北方有美一人松浦之鄉淡衣小學  
破此天荒肉食何憂藜藿忠腸我昔見公其言孔臧  
白髮骭麟永懷不忘刻茲玄石昭示茫茫

處士安公墓碣

公諱堯佐字廷老生五歲而孤母金夫人能效以義  
方嘗令就其兄正郎樞而學焉其兄死又令遍學於  
鄉里能文者及長博洽書史見重儕友間屢厄於公  
車夫人泣曰吾老矣恐未及見汝一第公心悲之已  
而夫人卒公仍廢舉攜家歸果川故里自是不肯入  
城市親朋多宦達而未嘗從游有來見者亦不肯  
謝曰平生厭見貴人窮居三十年生事蕭然而口不  
道貧字於人無絲髮求索杜門默坐手不釋卷其論  
古今人出處得失語纒纒不窮寬厚和平恥言人過  
惡而臨事亦不依違苟且以是鄉里皆信而畏之病



陽春先生集卷三十六  
革舉扶而坐自誦朱子武夷棹歌至桑田海水今如  
許泡沫風燈敢自憐之句沉歎再三辛亥九月十八  
日卒去其生 孝宗丙申七十六命諸子曰我死必  
葬先人山足子衡不敢違安氏出順興自謹齋軸至  
文肅公崇善連五世大顯曾祖諱祥進士祖諱春仁  
考諱悟公配青松沈氏縣令桐女男衡衢皆進士三  
女適進士韓珪士人李夏根林衡衡男載泰載復衢  
一男幼余嘗一望公顏色質而無華可知爲有德人  
又從公二子游得公內行甚詳金夫人嘗患腫輒自  
吮之有一姊夫人甚愛之公順其志邀姊兄與居姊

兄死當寒營葬手足至於輒瘞姊之女得奇疾爲之  
就醫入京三歲而瘳乃擇對以歸之夫人又不忍離  
公又爲之畜其壻而教之以終夫人之世夫人歿姊  
亦老事之如夫人及其病且喪也又不畏疫癘若庾  
袞之於其兄每值喪餘號痛如袒括時旣病蹒跚不  
能拜而其哭如嬰兒諸子諫之則曰吾在世其幾何  
公以孤童能力學自立雖不幸窮厄以卒其身而孝  
友之實孚于鄉黨子孫又皆以文行自勵以業其家  
是蓋金夫人義教之力而天之所以報公者其或在  
斯歟銘曰



降者先生集卷三十六  
吾聞忠信十室必有夷考其行維孝與友何求于外  
我則有受持以善我且以遺後勿云無天公乃有壽

處士安公墓碣

鄭承旨厚卿東後嘗爲余言吾友有安仲和者林滄  
溪泳一見而悅之謂吾鄉人曰子國有顏子其賢可  
知也既又泣曰吾友篤志力學不幸短命死矣仲和  
名汝諧世居咸平以其善病故自號理病齋云公生  
有至行幼而喪母嘗見雀雛開口望哺卽泣然曰爾  
有母我獨無父疾醫言當用車前子時方冬月出而  
采擷以歸疾遂愈九歲削瓢而圓其形一依家禮祭

饌圖陳而習之天姿穎悟早知俗學外有用心處動  
靜云爲多暗合小學常手書九容九思又作讀大學  
詩及務本詩以自勵如太極圖碁三百算法犁然有  
得未冠而已有來問學者輒書牛溪先生書室儀示  
之及長所與游皆湖之望士莫不推重期以遠大壬  
戌中司馬己巳尤齋先生謫耽羅候風於金山之萬  
德寺昇疾往拜質庸學奧旨以及先儒出處仍獻七  
言詩先生稱賞曰此好詩也又請教先生大書操心  
主一四字又示以養心養病之要公眷眷服膺焉與  
鄉黨設書襖每旬朔齊會講學以早孤不及養爲至



陶菴先生集卷三十六  
痛移孝而事其兄服勞左右雖子弟衆不令代之待  
宗族有恩與朋友以信以至僕隸之賤慈惠周洽見  
善如就芝蘭聞惡如負芒刺氣味溫醇人見者自然  
敬而愛之如不欲舍去其歿也哭之皆哀或有爲之  
服者公年三十五辛未十二月十五日卒葬于同縣  
塔洞向丑之原室瀛州梁氏耐安氏出竹城高麗文  
惠公元衡其上祖我朝吏曹參議魯生禮曹參判復  
初繼而顯曾祖信厚祖希吉考生員國宰皆以行誼  
聞外祖瑞山柳泰翊進士公三子晚陞晚屋季日晚  
觀能世其學余嘗怪漢之黃憲特一布衣耳言論風

旨無可概見而史氏特書之何哉朱夫子嘗斷之曰  
畢竟是姿稟好今公之見稱於士友間者偶與之合  
不知果傳於後世如古人否公則不但姿稟好其實  
行之孚于家而著于鄉者又如彼焉則公雖蚤死而  
其可傳於今與後也無疑公歿後幾年鄉人立祠祀  
之云公所著東遊錄明東寶曆摠要歌及論學諸篇  
藏于家晚陞以厚卿所爲狀來乞銘銘曰  
維湖一方賢士多有求道之早莫與公耦而質之淳  
而氣之和而不假以年嗚呼天耶

進士李公墓碣



陶菴先生集卷三十六  
余既爲城隱李公銘其墓矣城隱公有子曰祉億字子求 肅宗庚午進士年四十一戊寅卒葬于城隱公墓側公事親有深愛左右周旋之節無或違禮務以順適爲意而亦能隨事幾諫平居戰戰兢兢殆古所謂頃步不忘者間與少年會人有浮薄悖俚之言則輒端坐正色曰吾輩俱有父兄其可以不在傍而少怠其志乎座中相勅曰無戲言有監察在耿介絕俗一个不欲取諸人嘗曰人之所恥惟苟且二字若不計苟且則推其心何所不爲蓋公居家言行克類城隱公而至其蹈矩之嚴處事之確又或過之云城

隱公亦嘗曰吾兒刻苦吾所不及嗚呼少假以年使從事於性理之學所成就豈止於斯耶室海州吳氏生於壬寅歿於乙酉與公耐男翊烈女婿鄭植鄭陽元進士翊烈之男基敬文科壯元正郎次基性基正余少委禽於陽谷吳忠貞公家公之婦翁參奉斗奎卽陽谷之弟也海昌都尉秦周時語及公每曰某冰玉人也余嘗願一識公而不能得近者辱與公子孫遊因以得公爲人詩曰雖無老成人尙有典刑豈不信哉銘曰

稟質如良玉持身若處子懷其人而不可見作斯銘



陶菴先生集卷三十六  
今詔無止

僉知李公墓碣

吾宗有僉知公諱涵字潤九忠厚長者人也九歲而孤鞠于叔父宣傳公後儀宣傳嘗稱有心德公家世清貧而中年嬰喪禍流落海西能服田力穡不辭勤苦百事後志若神助然居十年資產頗饒則曰於分足矣自是不復長尺寸惟以節用爲事旣而又歎曰此樂土也然不可長子孫擇師送子而教焉尋挈家還交河又遷于漢師之西江晚又寓坡山用優老恩授通政旋除僉知中樞府事一謝而歸翌年庚申

六月八日卒壽八十二我李出牛峰同祖高麗侍中公靖公之先有參判淳錄清白緝執義執義曾孫守敬僉樞生通德郎寔生後綱是爲公三世妣濟州梁氏濟艇之女室淑夫人慶州金氏重寶之女二子命赫命直女適俞漢喆命赫男榮槃槃條婿申光斗柳膺吉命直男幼婿閔希聖公內行甚篤自以母喪薄葬終身痛恨服食務從儉老而衣帛猶懷蹶躅每祭必蠲潔致誠祭之夜不一解衣屢起觀星宿以占早晏年踰大耋猶然臨絕諄諄亦祭祀事也且置累代墓田甚厚從弟窮甚爲之割田以資其生從妹寡而



陽春先生集卷三十六  
有女貧不能嫁出錢貨以助之皆孝之推也資性謹  
恭粥粥若無能而當事果而確又以豫爲主故審慎  
縝密鮮有敗者與人交無親疎咸盡其忠愛而善者  
好之不善者惡之鄉里有窮急者必周恤之下至僕  
隸亦軫念飢寒無失其心焉公體力強健每晨寤盥  
洗正衣冠而坐未嘗一日廢嘗曰吾年八十未敢爲  
不善之事雖深夜獨居此心慄然常若鬼神臨之少  
而失學猶好觀粟翁要訣常自警省又晚喜小學手  
書要語九條以遺諸子孫公理家有法尤嚴於內外  
之別凡爲後人計不急小利不求近功惟以積善爲

心申申勉飭皆有德之言而一皆本之孝悌豈古所  
稱善人者耶公嘗見女奴以熱水瀉地呵之曰土中  
得無有蟄蟲否其仁心如此嗚呼吾知其必有後也  
公葬于富平柏寺洞參判公墓左用遺意也金夫人  
後公四年卒而耐命直卽從余學者涕泣乞銘銘曰  
嘻公成家本之稼穡勤儉勞苦厥善攸積仁守義教  
疇非彝則外若椎野世莫吾識惟有天翁餉以五福  
所貴有大曰惟好德我銘斯石悠久無泐

贈持平金公墓碣

余於往年僑寓驪州驪與利接壤稔聞守約齋金公



陽春先生集卷三十六  
謹厚長者及其卒也一境章甫欲躋享于雪峰書院  
聽於衆論咸無異辭適會有他故不果而余竊異夫  
末俗浮澆是非無真公之得此於人必有實心實德  
之自然孚感者矣今得其狀而讀之信然公諱碩勛  
字讓叔順天人我 太宗時平陽府院君襄景公承  
靈之後曾祖諱裕祖諱良弼考諱鏡隱德不仕而猶  
以儒素傳家持平安東金項其外祖也公生而器宇  
端嚴兒時嬉戲未嘗見屈於人嶷然有山峙之象孝  
友之行出於天性未弱冠遭父喪哀毀踰節三年不  
食菜果以母在堂左右就養靡不用極務以營辦甘

旨爲事或川而釣或野而獵以供朝夕之味而凡有  
炮炙必親自爲之而手至龜坼嘗爲製藥當暑擣篩  
汗流被面人曰僮指在何自苦如此公曰養親之事  
豈可使人代之及其丁憂朝夕祭奠流涕如瀉衰裾  
盡濕以至腐傷其祧奉先廟也每日晨謁躬親灑掃  
簷棲鳥雀汗穢廟階公於灑掃之際心語默禱曰左  
右何適不可而乃於是汗穢耶自是絕無棲簷之雀  
人謂孝感昆弟四人同居一室極其怡愉時有雞狗  
相哺之祥而如董家故事少工詩有聲場屋間賊臣  
金一鏡聞其名願與同契而公鄙其人不許至一鏡



隆慶先生集卷三十六  
敗人服其先見己已 聖母遜位公慨然廢舉專心  
爲學其學以涵養致知力行三者爲要不躐階級而  
夜朝之間間多閉目靜坐以立根基或有問爲學之  
方則曰非知之難行之惟艱其意蓋專主於力行云  
左右圖書爛熟用力而異端之書權數之說未曾着  
眼尤好朱子書沉看或到夜半雖病時開卷則神氣  
蘇醒不自知疲喜誦孟子首章嘗曰利之一字如刀  
剔去論人必取大節又曰譎詐甚不好雖以子房之  
才千載之下猶莫能掩其迹不喜黨論而至若辨邪  
正別是非則正言不諱無所回撓學如不及老年猶

不自滿常以歲月有限義理無窮爲憂人或勸以立  
言著書則乃曰幸生朱程之後義理炳如日星患不  
能服而行之安用書爲平生固窮安分絕無歆艷富  
貴之意與達者言輒有孟子藐之底意氣不與人相  
較鄉居四十年雖同里賤隸一不呵責以善居鄉聞  
不肯八偃室或有慕德來見者亦不造謝公生於辛  
丑九月二日歿于庚戌八月十日享年七十葬于府  
東後谷負壬之原室青松沈氏耐鄉人以公學行聞  
于朝特 贈司憲府持平沈氏通德郎孀女甚得婦  
道有三男二女男長最壽生員次大壽泰壽女適士



人李道祥申命有最壽子翼祥大壽繼子羽祥泰壽  
子祉祥最壽來乞銘銘曰

以公有譽而無毀余始疑以鄉原讀其狀而爽然徵  
實德之攸存識元惡於未朕斬焉所守之難援躋內  
行之脩潔孝父母而友諸昆主知行而爲程指古學  
之法門得師友而磨礱豈成就之止斯惟鄉里之矜  
式旣沒世而猶思爰發潛而闡幽盍考信於銘詩

通德郎閔公墓碣

立巖閔貳相之孫諱汝俊蔭補彰信校尉以討除叛  
民安戢鄉人之功 贈戶曹佐郎後驪陽文貞公以

本生親乞恩加 贈議政府左參贊參贊後孫仍世  
居扶餘旣蕃而昌而賢有諱構進士無子以弟教官  
根之子光尹爲後司贍寺直長生諱明重武科未仕  
而歿公其子也諱鎮翼字德佐自少聰明涉獵經史  
文貞公以參贊公改題南下見公寫祝筆翰敏妙歎  
曰此子可惜何可置之鄉曲勸令同歸與子弟共學  
公以親疾辭公性至孝事親色養善居喪三年不脫  
衰經廟後有梨樹先人所種常手撫感泣屢捷鄉解  
卒不耦委之於命無吝怨語雅好山水又喜爲詩丹  
巖相公莅完營請公以往游覽名勝多所酬唱老年



附錄先生集卷三十六  
丁內艱執禮益固淚盡繼血幾至失明自是廢舉時  
宗人多貴顯而公安貧守窮無意扳援年七十一辛  
亥四月二十一日卒葬于同縣薪巖里向午之原配  
完山李氏祔三男頤洙進士恒洙出爲人後鼎洙亦  
進士諸孫百慶百當百幹百榮公爲人仁厚事諸父  
如事父待諸宗如同氣見人之窮猶己之飢家雖貧  
必隨力周恤斯可謂一鄉之善士也歟公諸子以絳  
文貞公外孫來乞銘銘曰  
周鄉六行公有其美足稱善士嗟哉後人夙夜無忝  
餘慶在是

贈參判尹公墓碣

尹參判愨以武將死於辛壬士禍國人悲之其伯兄  
曰愿字子厚爲人莊重好氣節少游庠舍持論峻正  
考進士公嘗爲尤菴先生訟寃及先生之被後命  
也公亦同諸生拜章伸辨又守闕號泣者數日爲己  
已凶黨所嫉未幾誣以造訕竄利城利在嶺北數千  
里外荒寒非人所居至則夷然以詩酒自遣甲戌宥  
還攜家歸公州之蓼塘村偃仰嘯咏以終其世李相  
國頤命名其齋曰遺安 肅廟丁亥卒年四十六嗚  
呼公家號爲將門而喜士論積忤於人公一布衣也



而猶不免焉宜參判公之兄也使公不肯自晦又或  
久視而閱歷世變亦未必不與之同禍也公先始自  
坡平伯權其後孫敦出鎮咸安遂爲咸安人進士公  
諱翊商 贈大司憲其考榔宣傳官 贈承旨祖又  
進 贈僕正本生考曰知事天資外祖曰豐川任耆  
郡守公七歲而喪母哀號如成人及長居父憂一如  
古禮祭則齊潔致誠日必晨謁友於兄弟嚴於子姪  
又好施與隣家待以舉火者衆尤急人之難是以得  
鄉里心其喪也農者爲之不歌云葬於本州獨亭室  
順興安氏正郎至之女卒於公謫所至是耐繼配龍

仁李氏弘模之女後公二歲歿男台鼎象鼎命鼎夢  
鼎宅鼎女婿李德一元配出也諸孫曰景淵九淵洙  
淵洛淵時淵復淵溥淵在淵秉淵九淵宣傳官宅鼎  
今爲三道統制使封 贈如例余旣銘參判公墓矣  
又爲公銘銘曰  
惡於不善非善而何坎而能止亦可謂智耶然才不  
克見用年不免稱夭天也無嗟

通德郎閔公墓碣

士有高潔不俗篤行固窮者閔公齊夏文友其人也  
公驪興人自高麗尙衣奉御稱道始見于譜入本朝



有諱師騫忠清道觀察使於公爲八世曾祖諱聖止以孝 贈司憲府持平祖諱蓋亮不仕考諱鼎輔童蒙教官公少鞠於母家厚齋金公幹其舅氏也從而學焉公雖在城市性雅靜不喜交游惟淡坐讀書常曰人生至樂在於讀書此外何求晝夜誦讀未嘗或怠於經書幾至千遍厚齋與公書有曰閉門自守味衆人之所不味蓋用朱子勉輔漢卿之語期許甚至餘力治文詞最長於策出游場屋輒屈曹偶而卒不成名一時士友莫不嗟惜公筆法遒勁尤工細字嘗寫數十卷冊子無一畫放過殆古所謂卽此是學者

矣歲己卯都下大疫一旬之間丁內外艱公方在痛中纔退熱而袒括之節一遵禮法李孺人先一月歿時無主饋者僮僕又皆出幕朝夕炊爨躬自爲之未嘗違時其執喪也雖蔬菜之屬少有滋味則絕不近口晚年語及此事未嘗不嗚咽掩泣曰人子送終之具未能校於心此吾終身痛恨也又曰家甚貧乏祭需凡百一不如情理心甚痛迫惟當以誠禮爲主耳有一弟愛之甚食則同床弟或出而不還則雖日晚未忍獨食弟亦事之如嚴父公爲人貞介雖燕居之時身絕惰慢之氣口無鄙俚之言接人少欵洽惟以



附錄先生集卷三十六  
誠心相待嘗曰人一有苟笑卽是病于夏畦平居疏糲不繼而一个不取於人雖有時屢空而處之迥然也丁巳閏九月十一日卒去其生乙巳七十三以十月葬于陽智秋溪里負亥之原室韓山李氏別葬高陽先山繼配咸陽朴氏凡二男二女男德修女爲李相禹妻者元配出男恆修女適監役尹得庚孫曰鍾醇餘皆幼李宗海尹先東兩婿子也恆修從余游來請銘銘曰  
如玉之潔一塵不能侵我不見其人而得其心

通德郎鄭公墓碣

公諱纘明字敬夫延日人參奉諱星徵之子郡守諱雲翰之孫典籤諱雋之曾孫圃隱先生其十一世祖也母洪氏南陽君師範之後考曰鏞公自幼已有老成名甫成童從南丞相九萬學九萬始有士望及甲戌秉軸庇護國賊自絕於名義公明言而絕之晚與蹇窩安公重謙素隱金公性豪爲道義之交及二公歿公益蹢蹢無當世念然猶眷眷於爲己之學至老不懈年六十三以癸丑十二月五日卒於其從姪錫尼山官舍用明年正月二十五日葬于縣南負庚之原公配孺人李氏先公十四年歿及是移其封而祔



於公焉公天性孝友嘗於前喪作戴星之行終身以爲大戚自以支子不得將母而微此無以伸其情理中歲定居於黃山之金巖奉板輿以歸溫清之節甘旨之供靡不盡子職不令親知其貧也及喪傾家自盡於終事自失怙以來事四兄如父視兄子猶己出衣食與共之內行之篤如此公從兄纘輝尤菴門人每字公曰惟此子可與共我家學蓋同堂間知己也其子鍊亦佳士其稱公德美有曰冰清玉潔不求人知八字可以蓋吾叔平生又敕其甥申大來作公行狀其狀公容貌曰譬如寒林雪竹恨余不及見公惟

至親心悅之辭尙可以得其彷彿遂以此終焉其視傳畱侯而徵畫工者豈不信乎哉李孺人國姓必茂之女舉三女士人金碗金鎖九尹休基其壻而爲公後者公之仲兄纘馨子鑰也鑰在時辱屬以兩世墓文今余老病且死未忍孤負亡者之意書以遺其孤若公世德之詳已具於參奉公碣中矣銘曰  
以圃翁之孫而不能大紹厥學斯爲沒身之恨狀公之德而取重乎窮老信非阿好之論

贈持平洪公墓碣

有以文章行義重於當世而自處以天地間窮人阨



陸者先生集卷二十六  
蹙以終其身者曰洪公泰猷字伯亨唐城人洪自麗  
代已爲名家入本朝石壁春卿拙翁聖民連世以文  
大鳴至平安道觀察使命耇殉忠于丙子虜難其子  
重普右議政 寧陵名臣是生得箕尚淑安公主卽  
公祖考也考諱致祥司僕寺主簿娶判書李正英女  
以壬子二月二日生公穎秀絕異凡兒三歲能誦滕  
王閣序稍長文辭驟進公幼失母人有語及母氏者  
輒慘然下淚事二繼母孝愛篤至己巳主簿公遭罹  
奇禍其在綫也擊鼓鳴冤而不見施則乃以破衣草  
履奉貴主手札奔走遍訴於時宰之門其涕泣遑遑

之狀有足以動人心者柄相之凶狠者猶不忍見慰  
諭而遣之語人曰自上若親見此子或可感回矣  
主簿公竟受禍公叩心槌胷若不可以自存而上憫  
貴主之無依下懼宗嗣之靡託銜恤茹慟董保性命  
而處變之際咸得其宜凡所以慰安貴主之道靡不  
用極見者皆嗟歎自是以來以罪人自居屈亢厲之  
氣而反之於枯窮變綺紈之習而守之以儉約杜門  
屏迹不與人徵逐枕上常有涕淚痕三十年如一日  
甲戌更化 上逆黜羣凶召用舊臣首下 備忘特  
復主簿公官爵丁丑貴主捐館舍 上親臨弔祭



命公以衰服入侍 上惻然下哀愍之教又指天而諭之曰汝視天君則天也公流涕承 命而退每語家人未嘗不嗚咽也公以義洞賜第非儒士所當處遂毀而賣之其木石花卉之屬直累千金公一委家人而不問價多少或分諸一家親知其無意產業而好施與如此後辛巳逆獄大起杭與諸賊伏法公意謂杭罪已彰主簿公所被丹書中誣人惡逆一端自可昭暴復擊鼓鳴冤痛陳前後事實趙泰者挾私憾上疏反攻其爲言僭毒 上入其說還奪主簿公官爵公號泣愍痛益無世念黃驪之勝甲於上游而梨

湖又爲驪之佳處且於先墓密邇公甚樂之遂築室而居扁之曰耐齋公雅喜爲文章凡有憂愁感憤不平于心者一發之於文於書最嗜論語讀之甚熟人有以學問勸公者輒瑟縮曰此非吾輩事也嗚呼公躬孝悌之行有介特之操考其可見之行則子夏所謂雖曰未學吾必謂之學矣者公實有焉公以乙未十月二日卒初葬梨湖屋後甲辰十一月移卜砥平花谷坐壬之原公歿後二十四年今 上戊午公之子益宗繼公遺志暴主簿公冤適春旱疏決 上詢問筵臣咸一辭訟寃且白公至行於是 特命伸雪



始復主簿公官爵仍 贈公司憲府持平公之哀榮  
可謂至矣非公至孝血誠孚格上下何以得此哉嗚  
呼躋哉公室全義李氏父曰知敦寧徵夏舉四男二  
女男長益宗縣監次益大次益三文科方爲忠州牧  
使次益謙未冠而夭女適士人金時筦參奉趙明箕  
益三男相殷相文相殷爲益宗後實尸公祀金婿子  
哲行益三來乞銘銘曰

有美一人兮梨湖之濱草衣木食以終身兮玉佩瓊  
琚中自珍兮曰天降割兮匪天不仁吾實不子兮天  
地之窮民死目難瞑兮鬼神悲幸至誠上格兮天理  
必伸 褒贈有赫兮哀榮絕倫我生併世兮偶失相  
親其心炯炯兮尚如隔晨銘以表之兮昭揭千春

通德郎安公墓碣

公諱允成字君集竹山人考諱相奭進士祖諱絢通  
德郎曾祖諱廷燮司僕寺僉正始通德公抱材不耦  
老於交河月籠之陽中經喪故家業凋落公以孤童  
克自樹立悉復田園林沼之舊旣而歎曰吾爲子不  
及養又不能顯吾親今惟有祭祀之節邱墓之事耳  
於此不盡其力吾惡乎用吾情四時時享如禮享需  
必豫而不寤精而無侈世俗多以拘忌廢祭公慨然



隱者先生集卷三十六  
曰人生百年享先之日幾何或遇癘疫則移就潔地  
而行之凡先墓樹石之役無一不舉而約其制度務  
爲堅緻又推及於劬尊姊妹之無後者殫精竭心如  
是者四十年一石工感其誠與之終始且勅其徒曰  
此孝子也切勿言手直多少公少事公車業去之常  
曰士不得於時則田野而已治家儉且勤計口而耕  
量入而出用度旣裕調恤以義邑中行呂氏約公實  
主其議間設飲射之禮禮容可觀旣老謝絕交游杜  
門自守足不入城府一毫不干於人人有趨時附利  
翁翕馳逐者視之若浼焉李忠愍公健命有累世同

閉之好貴盛時不肯造其門及其遭禍門客皆畏懼  
不敢問公先往弔之人以爲難公爲人方嚴敦確平  
居儼然有不可犯之色子弟無敢闌笑於前家內斬  
斬寂若無聲言論峻正尤嚴於淑慝之別與人交不  
設表襮見其有不是處則面斥而不饒事無大小必  
挈其要領不煩聲色一言立判雖敗局棼絲之莫可  
如何者到手若無難焉其幹具如此嗚呼今人多厚  
於自奉而忽於報本若公終身所行固富貴者之所  
難能也况士之有能者鮮不銜鬻於人退而自藏者  
輒拙於用公則有其才而不求人知老死邱壑卒不



陽春先生集卷三十六  
易所守是其中必有大過人者惜乎其不見用於世也僉正公嘗言守分居靜慎交六字是吾家家法亦嘗以小學書爲準則公一生受用而不失又以是戒其諸子云公卒於乙卯閏四月十日年六十三明年葬於楊州松浪里先塋辰坐之原孺人李氏耐李氏通德郎廷高之女 英陵別子密城君璫之後先公十六年而歿和柔有婦行四男五女宗胄宗茂宗耆宗秀婿曰李德用李慶昌李沅閔範洙一女未笄而夭宗茂來乞銘銘曰  
報先以誠理家以正聖不云乎是亦爲政有能有守

孰使羞行我爲時嗟莫曰有命

學生朴公墓碣

朴君聖百歿後十有幾年其孤鳳陽泣曰吾先人行諛卓殊藐茲穉昧莫由顯揚其將泯沒已乎或謂曰國家尚節行殆比屋而旌子盍亦圖之曰不願也是吾先人之所不喜也先人有友曰某今世士大夫求銘章者多之其門是庶幾不朽吾父者遂抱狀而謁余拜且泣余曰若來宜也吾與若翁交俱未冠宅于都于郊相近也知若翁莫若我詳若翁孝者蓋無有知者其侍家大人疾凡百餘日晝不遑食夜不假寐



飲食藥物床褥矢溲咸敬扶持之一不令人代余自  
郊往視之不見數月鬚髮皤如既而又往弔則其泣  
若孺子面淡墨杖而後起無何訃書至嗚呼余不知  
古昔所稱不矧不翔不怠不解者視君何如耳聖人  
謂滅性非孝然君則因心盡職而已豈欲其至於是  
哉君名祖道遙堂世茂潛治公知誠學源於孝至君  
大父諱彭祖不勝喪年三十八與君同君能世其孝  
如此不既賢乎哉鳳陽起拜曰銘如是幸矣君咸陽  
人諱叙揆聖百字辛卯四月三日卒墓在楊州神穴  
里考諱汝興參奉妣韓山李氏某官某女慈惠有婦

德君男女七人景陽挺陽士人趙漢寔辛命三李觀  
迪李慶章妻鳳陽其長君常與余同舉業其勤篤不  
可及卒邈迤無成鳳陽能力文舉進士天之報君或  
於是在歟銘曰

嗟惟聖百死於孝也其友銘之非諛墓者

學生李公墓碣

李生德晦從余游一日泣且言曰德晦不天生五歲  
而喪父直一天地間鮮民耳禮曰有善不知不明也  
知而不傳不仁也吾父實有過人之才行不忍其不  
知不傳以重吾不孝願先生之哀之也吾父七歲已



知與女弟不共食十歲又能與羣兄弟習祭儀設石  
爲俎豆十八歲讀尚書暮三百瞭然心解仍推以造  
曆隣居有敬菴李先生一見奇之一日不見輒言於  
吾王父曰願聞令兒高論自是師事之先生許以信  
道誠篤嘗上龍門寺讀書寺有水陸三日會詭怪雜  
陳而處之若無覩者文藝夙成尤長於詞賦屢捷發  
解顧非其所好也天姿溫恭樂善好義其學以真實  
刻苦爲要事親諸節一依小學出入夫婦相拜平居  
坐必危坐造次顛沛未之或失博觀羣書以至天文  
地理算數兵法之流靡不旁通而意亦不屑也不肖

穉昧不能省記顏面况於其德藝之際乎然而其得  
於吾王父與父之執者如此余惟人生氣稟不齊有  
德者未必有才才有才者未能有德此古今之公患若  
君者可謂有才以德千百而僅一遇者天之生之若  
不偶而殺之又何意耶自古賢而無命如君者亦多  
矣人無所歸咎則曰天也天亦何嘗有好惡於其間  
哉嗚呼其可哀也已君諱後白字文素 成宗大王  
別子有曰楊原君禧四傳爲通德郎世積有隱德生  
時雄忠義衛是生君妣茂長金氏監察克良之女君  
赴舉至延安得疾以甲申八月二十八日歿于旅舍



得年纔二十八一路人士知不知咸嗟惜焉葬於金川島地洞君凡再娶昌寧成氏光州金氏德晦成氏出生員有二男幼敬庵名行泰以篤學固窮有名于世余旣悲君不幸又嘉德晦之志遂爲之銘銘曰噫昌黎之哭元賓也曰才高乎當世而行出乎古人已乎元賓竟何爲哉竟何爲哉吾於君亦云

學生尹公墓碣

海平尹公杖長余一歲初未與余相識一日枉叙從容一見可知爲忠厚質慤之士也仍遣其子湛游學湛歸輒問其所業書且令誦其見聞迺然而喜往往

若有契於心樂善好義蓋其天性然也嘗曰吾有三悔家貧親老分當治稼供養而無所營爲未盡子職一悔也妄意榮進徒業時文不更留意於經學悠悠度年復至老衰二悔也少時汨沒塵臼不能追游於斯文長老之門以資薰炙之益三悔也仍以三悔扁其室絕意外求循分自樂湛亦謙恭自持恥爲不善其義方之教可知也公旣卒余以詩哭之三年之喪畢湛又來請曰吾父於先生實爲見慕之徒願藉一言之重以慰逝者余不能辭遂取其狀而叙之曰公字敬甫曾祖諱昉司憲府掌令祖諱應海宣教郎考



附錄先生集卷三十一  
諱廷麟通德郎外祖教官東萊鄭熙暫居於楊州忘  
憂里年六十四壬戌八月四日卒葬于本州魚隱洞  
先兆公孝於親友於兄弟敬于朋友治家儉勤絕不  
爲苟且之事鄉里皆稱以長德而貧窮鬱塞以終其  
身嗚呼善人何勸焉公凡再娶完山李氏春萱之女  
丹陽禹氏以夏之女二男湛其長濂早死淹出爲叔  
父後皆禹出也系之以銘曰  
是惟一鄉之善士不羸其躬而尚其孫子

學生黃公墓碣

公諱璣字聖齊長水人其先有諱廷或號芝川官兵

曹判書兩館大提學以文章大鳴 穆陵之世後四  
世至定山縣監諱爾徵生諱暉司僕寺主簿生諱處  
信戶曹正郎 贈吏曹判書出後于其仲父 贈參  
議諱賊是爲公之考也公生而聰敏博學強記尤喜  
爲文辭弱冠能下筆數千言識者謂芝川公有孫不  
幸遇疾自廢年四十而夭余往歲辱與其兄觀察公  
璿游於公雖偶未識面而因亦得其人焉公蓋癖於  
文者平居泊然無所好惟酷嗜古書方其沉思力索  
處若忘行若遺儻乎其若喪芒乎其若疑視天下萬  
事無足以入其心者疲神竭精不自知其疾之作閉



門淡居不與世相聞如是者凡十九年而亦未嘗一日而廢書也間從人圍碁賦詩終夕盡懽容去不問其人爲誰也公爲人清粹無塵俗氣襟懷疎宕若不拘拘於法度然自幼善事父母未嘗少違其志及居判書公憂已病而能自力致哀其實行如此公嘗自以少時所爲文不可意悉棄之將大讀六經諸子之書積之閎博而後發之沛然以蘄及乎古之立言者苟使不病而又假之以年則庶幾其至也而卒不克如其志豈非命耶然而使公蚤用力於聖人之學其成就豈可量而又焉有斯疾也嗚呼是尤可惜也已

公兄弟始受學於母夫人夫人正言完山李公敏徵之女通書史有女士之稱云觀察公戊申平嶺南寇亂旋卒公亦於是歲十二月癸未歿以明年二月葬于長湍沃陰里坐戌之原配安東權氏其考吉城君最有子曰景源能以文業其家景源來乞銘銘曰  
既與之以才胡與之以疾又胡不與之以年嗚呼其天

進士朴君墓碣

朴君士行於余爲故人子士行則待余以師嘗有持身不端者詣門請業余未忍顯斥士行聞之惑甚亟



陶菴先生集 卷三十六  
來見余言其人之不可不絕余告以互鄉故事而不  
之信也歸路感疾至家而卒卽庚申五月二十四日  
得年董三十三余哭之哀後其人不復來蓋畏士  
行鳴鼓之義而卒不得良死士行可謂有先識而亦  
見其愛余之深也君名景陽士行其字咸陽之朴盛  
自羅麗入本朝兵曹判書習大顯歷三世至消遙堂  
世茂著童蒙先習行于世逍遙之孫曰潛治諱知誠  
尤菴稱爲斯文先達於君爲五世祖諱汝興參奉考  
諱叙揆勤學而不成名以孝稱妣南陽洪氏府使處  
宙女相國瑞鳳之曾孫兄弟三人君居其二四歲而

孤事其兄如嚴父力學攻文日以勤劬每入場操紙  
筆立就人服其瞻敏戊午中進士聲望日茂以國學  
不古士趣大壞不肯一涉足於其間又慎交遊所與  
友者皆一時名士及兄歿訓其子猶兄之訓已愛其  
弟尤篤至頃刻不相捨於爲先之事積誠靡懈取東  
國文集稗說之屬有語及世德則採括包羅名曰知  
仁編要以揚前烈於無窮可謂孝矣間嘗謂余曰親  
在不忍廢舉不得不爲一月內科學分半如程子所  
云者耳蓋其意必欲克紹家學且將進進不已而遽  
已死矣嗚呼惜哉君葬于楊州神穴坐壬之原從先



附錄先生集卷三十六  
兆也配崔氏無嗣以兄子載和爲子二女未字銘曰  
朝之言嘻嘻夕之言怡怡一日不見而死吁其悲

孺人南陽洪氏墓碣

鄭公敷葬于林川頒詔院遂菴權公書其碣曰鍾崖  
處士字某之墓婦洪氏泣而謂其子五奎曰乃父生  
而志不就得名儒表揚其死猶不死也越十有三年  
戊申洪氏卒壽七十三五奎遷處士墓而合祔于其  
傍幾十步五奎旣免喪謁銘于三州李緯曰五奎母  
清溪公之少女清溪公以文學鳴世諸舅能業家而  
姨母爲金副學萬吉夫人者世所稱碩媛母生長其

間略通古書大義又工於女功十九歸五奎先君先  
大父牧使公簡嚴少可人常曰吾賢婦總功之親咸  
萃一室無大小無二口治柵有法至老克勤被服儉  
而潔截肉必方正先君寡交遊或有嘉客至則觴豆  
立辦人不知其爲貧待妾祖姑如姑鞠孤姪若己子  
以父家零替常存侯夫人百五之感歲送乾豆助祭  
薄榮貴安澹泊一以承順夫子爲志聞子弟讀史有  
奸邪亂逆之事則爲之憤歎或論斯文是非時事得  
失語鑿鑿中理性慈仁雖昆蟲草木之微不忍傷於  
人無忤克又未嘗一言其過惡下至僕御之賤莫不



有恩故其歿也哭之者咸哀又作曰吾母之賢若此卒窮困以死不得君子一言吾無以見吾母於地下矣絳悲其志不能辭清溪公諱葳南陽人官止觀察使其配德水李氏牧使椐考也夫人三男具在處士公碣文孫揀掄及爲參議李匡德士人李商重妻者五奎出擇五緯出餘皆幼五奎嘗遊遂菴門以文行稱余又知夫人之教成於家也銘曰  
幼爲賢婦老爲賢母展也女士我銘不朽

淑人恩津宋氏墓碣

淑人恩津宋氏者正郎南公躔之配也 崇禎甲辰

生於懷德之宋村乙丑歸南氏南氏世居咸昌淑人年六十五戊申四月六日卒葬于聞慶立巖負乾之原淑人嘗命其子道轍曰吾婦人無名德可記然我死必請銘於當世立言者道轍旣卒喪來謁文於絳泣而言曰此吾母之志也絳辭不能文請益力遂取其狀而讀之蓋正郎公所述正郎公爲人敦朴其言不華淑人之賢益可信也淑人幼而聰穎略通經史大義父母奇愛之曰恨汝不得爲男子以大吾門也十五母安夫人棄世時祖縣監公在堂諸弟穉弱淑人獨任家事老幼衣服飲食之具各適其宜宋氏歲



祭其遠祖淑人嘗一尸其事舉族會于雙清之堂觀其粢盛蠲潔咸嘖嘖曰某家有女矣父患痘甚危家人恐延染勸其出避淑人泣不肯每夜露立禱天及喪號擗若絕三年如一日會失火火及殯室淑人奮身入火中抱主而出聞者驚歎及嫁以所以事縣監公兩世者事舅姑舅都事公嘗稱之曰吾家賢婦家內眷集甚衆皆得其歡心其治家有法晨起掃灑庭戶無一塵牧雞豚種瓜菜常用之祭祀賓客而不乏舍前後果木井井可觀皆其手植正郎公性嗜書疎於生事淑人不令知其有無也正郎公六十四始擢

第淑人喜而悲曰吾舅姑不及見也且泣曰父母既歿無歸寧之義幸吾不死惟有一瞻墳塋耳早晚得一縣可能遂此願否正郎公旅宦在洛淑人每速其歸曰年既老矣不如優游林泉以終其世也既而時象一變正郎公棄官而歸淑人甚喜之每暇日招諸子女環列左右申申然教以義方必先之以孝悌忠信又曰吾宗丈尤菴先生嘗言言到口頭更加思量此格言汝曹宜念之也余惟婦人之職納酒漿邊豆織紵組紉凡爲人子爲人婦所事不過此焉爾淑人才分過人於此數事固皆不勞而能之然世之能此



者亦不爲不少矣若淑人則博涉今古見識偉然能  
導夫子以正教兒子以義又老而孝不衰於父母其  
言往往有讀書男子所不能及者嗚呼其可銘也已  
宋之先有曰雙清堂愉是其名祖其後有柎壽郡守  
號松潭希進司諫院獻納於縣監公爲祖若考縣監  
公諱國士是生諱奎臨淑人之考也安夫人副護軍  
謹之女都事公諱極杓其考通德郎昌夏祖郡守嶠  
宜寧大族也淑人男道軾道輶道轍其仲女適士人  
朴衡齡宋齊泰道軾男宗泰宗運宗顯宗郁道轍一  
男一女皆幼朴婿子春囿銘曰

恩津之門生此碩女我書厥石庶幾永譽

孺人潘南朴氏墓碣

孺人潘南朴氏者宜寧南君道轍聖由之婦也其世  
曰潘南先生尙衷之後大司諫嘯臯承任之七世孫  
考諱泰來生員妣晉州姜氏孺人生于禮安之退溪  
村李文純先生其外王母之先也南君之父曰躔兵  
曹佐郎祖曰極杓義禁府都事孺人年二十一歸南  
君三十五而夭時庚戌二月十二日也葬于聞慶幕  
洞負良之原有一女幼聖由嶺士之秀者從余游一  
日具狀一通致其家大人之命曰吾子婦死已七年



附錄先生集卷三十六  
矣吾念其孝久而愈悲不惟吾心如此宗黨隣里莫  
不悼其不幸而思其賢吾不忍其泯沒而無傳也方  
治一石以刻厥美子其爲之辭余惟婦人少而死且  
無後而能得此於其舅者蓋寡斯足以知孺人矣孺  
人生四歲而失母稍長善事繼母繼母亦愛之如己  
出在夫家往往思念其親至於涕泣嘗臨鏡自悲曰  
吾外王母嘗言汝貌類汝母也又書鏡臺曰生而爲  
人不識慈顏悠悠蒼天我罪伊何豈傳所謂既嫁而  
孝不衰於父母者耶其事舅姑舅姑甚安之稱其德  
性則曰吾婦未嘗有疾言遽色又曰無一點忤克之

心其異宮而居也得一美味必先以餉舅姑作一鮮  
衣必先以獻舅姑姑之疾也夜立禱天及喪若孺子  
泣者其病且殆也猶以不得與饋奠爲恨其舅適在  
都下又恨不得告訣索其書摩挲出涕誠孝之至死  
彌篤如此又工於女事晝夜執勤不自知其苦顧語  
聖由曰吾爲貧士婦職所當然而男子抱負甚大安  
可自逸每勸以學問又淡以暴怒爲戒蓋聖由不免  
有東萊少時病也孺人自幼涉獵小學內則諸書故  
其見識如此噫孺人雖不克永其年而旣得乎舅姑  
之心又得乎宗黨隣里之心此無他孝之實有以感



之婦人之德如斯而已矣壽夭在天亦且如之何哉  
余之爲此言者蓋慰孺人之心且以塞佐郎公之悲  
云銘曰

生而舅姑安其孝死而宗黨懷其賢胡得於人而不  
得於天嗚呼孺人





